

金光明經疏

吉藏撰

妙諦法音

序 70

① 序品 77

A01 證信序 77

A02 發起序 78

 B01 通發起序 78

 B02 別發起序 79

 C01 為正說作序 80

 D01 經體作序 80

E01 為壽量品作序	80
F01 歎經體	82
F02 歎經用	82
F03 明能說者	83
E02 為懺悔品作序	84
F01 表	84
F02 釋	84
F03 結	85
D02 經力用作序	86
E01 得經力用	86

F01	明所滅惡	86
G01	明因現事生惡愁	86
G02	明因未現事生惱	88
F02	明能滅行	88
E02	經力用大	89
C02	為流通作序	90
D01	流通壽量品作序	90
E01	歎值得	91
E02	明弘經得果	91
E03	明勸修行	92

E04 明結弘經人	92
D02 流通懺悔品作序	93
② 壽量品	93
A01 信相疑念，四佛降現，降室現瑞	93
B01 明疑念	94
B02 念因疑果	95
B03 明降現	95
B04 現瑞蒙益	96
A02 信相請問 四佛為說	97
B01 明信相陳疑請問	97

B02	明四佛為說	97
C01	試勅略表	98
C02	集會廣釋	98
C03	雙結	100
③	懺悔品	101
A01	長行	104
B01	明信相夢中見聞	104
C01	見如來應	104
C02	見眾生感	105
B02	夢寤往佛	106

A02	偈頌	106
B01	陳述所見	107
B02	陳述所聞	107
C01	總標	107
C02	別述	108
D01	明離過行	108
E01	明歎教勝用	108
F01	明拔苦與樂用	108
G01	明拔三種苦	108
G02	明與三種樂	109

H01	明與無畏樂	109
H02	明與菩提樂	110
I01	明諸佛所證	110
I02	明與菩提樂	110
H03	與寂滅樂	112
F02	明滅惡生善德	113
G01	明生信	113
G02	明生解	113
G03	明生行	114
G04	明令願滿	114

F03 結	115
G01 舉地獄重苦	115
G02 舉流轉長苦	115
G03 總舉重苦及深苦	115
G04 總結滅苦	116
E02 明離過行體	116
F01 懺悔	117
G01 約起惡因緣以明懺悔	118
H01 明發願	118
H02 明勸請	119

H03 明懺悔體	119
I01 總懺	119
I02 別懺	120
G02 據造惡時節以明懺悔	123
H01 明發願為內因	123
I01 明願上供諸佛	123
I02 明願下化眾生	123
I03 明願得佛果	125
H02 明諸佛為外緣	127
I01 標	127

I02 釋	127
I03 結	128
H03 明懺悔	128
G03 作惡及受報處以明懺悔	129
H01 明迴向	129
H02 明正悔	130
I01 總懺	130
I02 別懺	131
D02 明攝善行	133
E01 明勸請	133

F01 歎佛德	133
F02 明歎	135
E02 明發願	136
F01 通為自他發願	136
F02 別為自發願	136
F03 別為他發願	137
G01 明拔苦願	137
G02 明與樂願	139
F04 結為自發願	141
F05 結為他發願	142

E03	明隨喜	142
E04	明迴向	142
D03	舉利勸修	143
E01	明修因離過	143
E02	明修因得果	143
D04	歎經難聞	144
④	讚歎品	144
A01	長行 舉能歎者	145
A02	偈頌 正述信相昔日讚佛等事	145
B01	明讚歎	145

C01 總歎	146
C02 別歎	146
C03 明歎不可盡	150
B02 明迴向	150
B03 明發願	151
C01 結前起後	151
C02 明發願	151
D01 願夢見金鼓得聞懺悔之聲	151
D02 願得如來面貌清淨	151
D03 願夢見如來晝如實說	152

D04	願行六度先人後己	152
D05	願值釋迦得授記莢	152
D06	願為作眾生依止處	153
D07	願煩惱業海悉竭無餘	153
E01	誓行道	153
E02	正願	154
D08	願得如來眾德具足	154
D09	願拔眾生苦與眾生樂	155
D10	願得淨國土猶如諸佛	155
E01	誓行道	155

E02 正願	155
A03 結會古今	156
⑤ 空品	156
A01 序略說之意	156
B01 表今略說	156
B02 釋略說意	157
B03 明此說略令蒙眾生機	158
C01 知機	158
C02 說教	158
A02 正說空理	159

B01	明人空	159
C01	明五非常門	159
D01	明無我門	160
D02	明無常門	160
D03	明空門	161
D04	明苦門	162
D05	明不淨門	163
C02	明結觀空	164
B02	明法空	164
C01	明色法空	164

C02	明心法空	165
A03	明觀空利益以勸修	165
B01	舉果益以勸修	166
C01	明自利果	166
C02	明利他果	166
D01	明轉法輪果	167
E01	就理明轉	167
E02	就教明轉	168
D02	明攝化眾生果	169
E01	明摧邪德	169

E02	明拔苦德	169
B02	舉因益以勸修	170
C01	明難行能行	170
C02	明難捨能捨	171
⑥	四天王品	172
A01	明四王願弘	173
B01	出能弘人	173
B02	歎所弘法	173
C01	歎經德重	174
D01	諸佛愛重，明此經顯性德之因	174

D02	諸天禮敬	明經生修德之道	174
D03	四王讚佛	明經成修德之果	175
C02	歎經多能		175
D01	生智慧		176
D02	與快樂		176
D03	明滅苦		176
E01	別明		176
E02	總結		177
B03	明法為人弘		177
C01	明四王聞經獲利		178

C02 發願弘通 178

 D01 明四王自願擁護 178

 E01 王願護 179

 F01 四王自明有弘護德 179

 F02 正發願 179

 G01 願護國 180

 G02 願護人 180

 E02 如來述 181

 F01 讚 181

 F02 正述 182

G01	述成有德	183
G02	述成願護	183
H01	護人	183
H02	護國	184
D02	勸他弘通	184
E01	正勸他弘經	185
F01	四王勸	185
G01	勸國王弘經	185
G02	明四王擁護	186
H01	四王聞法得利	186

H02	明人王被護	186
I01	明護法	186
I02	明護人	187
I03	明護國	187
F02	如來述	188
G01	四王擁護	189
H01	述成護法	189
H02	述成護人	189
H03	述成護土	189
I01	略述	190

I02 廣述	190
I03 結	191
G02 國王弘經	191
H01 人王弘經	191
H02 天王得益	191
H03 勸	192
H04 勸天王護	192
E02 示弘經方法	193
F01 示弘經方法	193
G01 四王勸	193

H01	舉果報	193
H02	明修因	194
I01	明重法	194
I02	明敬人	194
G02	如來述	195
H01	述敬人	195
H02	述重法	196
F02	示用心方法	197
G01	四王勸	198
H01	示聽法運心	198

H02	示供養運心	199
G02	如來述	199
H01	此土釋迦述人王供	200
I01	明非唯照天宮 亦遠至大千	200
I02	明非但至大千 亦遍至十方佛土	201
H02	明他方諸佛讚四眾弘經	201
I01	明聞見興神變	201
I02	讚歎	201
E03	明得失以結勸	204
F01	四王結勸	204

G01	人王弘經 天聽受	204
G02	正結勸	206
H01	明不弘經者，則有國敗之失	206
I01	明不弘經	206
I02	明四王失利	207
I03	明諸天捨國	207
I04	明國敗亡	207
H02	明弘經者，則有土豐之得	208
I01	明人王欲得土安	208
I02	明勸人王弘經	209

I03	明四王得益	209
I04	明國安隱	209
H03	正結勸修行	212
F02	如來述	212
G01	述護人王	212
G02	述護眾	213
A02	明四王歎佛，如來歎經	213
B01	四王讚佛	213
C01	標	214
C02	讚	214

D01 讚應化二身	214
E01 略	214
F01 歎化身色光明	215
F02 歎身功德智慧三昧	215
E02 廣	215
F01 廣化身	215
F02 廣應身	216
D02 歎法身	216
E01 歎法身中體	216
E02 歎法身用	216

C03 結	216
B02 如來歎經	217
C01 歎經力大	217
D01 歎體	217
E01 明法	217
E02 明人	218
D02 歎用	218
E01 與樂	218
E02 生善	218
E03 拔苦	218

C02 勸人王弘 219

 D01 勸弘通 219

 E01 明弘者有利 219

 E02 正勸 219

 D02 明得益 220

 E01 法說 220

 F01 明生道善 220

 F02 拔生死苦 220

 F03 與因安樂 221

 E02 譬說 221

F01	寶樹	221
F02	冷水	221
F03	珍寶	222
C03	令天王護	222
D01	諸天供養	222
D02	四王護持	222
D03	諸佛護念	223
D04	鬼神擁護	223
C04	結上三義	223
D01	歎經力大	223

D02	人王聽受	223
D03	天王守護	224
A03	明四王歡喜，供養發願	224
B01	聞經歡樂	224
B02	散花供養	224
B03	願護弘經人	225
⑦	大辯天品	225
A01	利益說人	226
B01	明利益說者	226
C01	益四辯	226

C02 益總持力	227
B02 勸為他說	227
C01 所化人有善根	227
C02 勸為他說	227
A02 利益聽眾	228
B01 益福慧	228
B02 與四辯	228
B03 得佛果	229
⑧ 功德天品	229
A01 與說者所須	229

B01	正與所須乃至令得尋經	230
B02	勸令弘經	230
C01	明所化者善根	230
C02	正勸令弘	230
C03	明所化利益	231
A02	與聽眾財物	231
B01	明有與之德	231
C01	明宿殖善根	231
C02	明今身得隨意報	232
B02	明與所須	232

C01 略明	232
D01 明令其修因	233
D02 明得果	233
C02 廣說	233
D01 勸修因	234
E01 示處所	234
E02 勸修因	234
F01 修治內外	234
F02 明供養三寶	235
F03 明讀誦呪	235

F04	明修行發願	236
E03	明天來	237
F01	令興念	237
F02	明淨舍宅以待	237
F03	明天神來	237
D02	明得果	238
E01	明所須無乞	238
E02	明始終扶護	238
C03	結勸	239
⑨	堅牢地神品	239

A01	明地神供養弘經之人	240
B01	表示處	240
B02	明供養	240
B03	明聞法得益	241
C01	明地神獲利	241
C02	明眾生得益	241
D01	明財利	241
D02	明法利益	242
D03	結	242
A02	明由供養故得弘經	243

B01	明地神請說此經	243
B02	明說經利物	243
B03	勸人聽受	244
C01	明教念	244
C02	明勸聽受	244
C03	明白慶	244
A03	明由弘故得勝果	246
B01	地神明得果	246
C01	明弘經	246
C02	明得果	246

B02	如來報述	247
C01	明聽者得報	247
C02	明供養者得報	247
B03	地神奉酬	248
C01	明地神供養說者	248
C02	明眾生聽聞	248
C03	明眾生得果	249
D01	明受樂報	249
D02	明得果	249
⑩	散脂鬼神品	249

A01	明能益弘經之人	250
B01	明神力擁護滅惡	250
C01	明能護之人	250
C02	明所護之法	250
C03	明守護之事	251
D01	護說者	251
D02	護聽眾	251
D03	守國土	252
B02	明以智慧氣力增益說者	252
C01	明能益之德	252

D01 表	252
D02 釋	252
E01 明能知二諦之德	253
E02 明有能知二智之德	254
E03 結	256
D03 結	256
C02 明益物	256
D01 明益事	256
D02 出益相	257
A02 明說者得益故能弘經	257

B01	明說者有智能說	257
B02	明聽者有善堪受	258
B03	明勸為物說成上第一	258
B04	明聽者得利	258
A03	歸依眾聖	259
⑪	正論品	259
A01	明緣起	259
A02	明正論緣起	260
B01	表起	260
B02	正是論說	261

C01 誠許 261

C02 請問 261

 D01 明四王讚請 262

 D02 四王請事 262

 E01 問 262

 E02 結 263

C03 釋 263

 D01 許說 263

 D02 正答 264

 E01 略答問正論之體 264

F01 答第二問 264

F02 答第三問 265

F03 追答第一問 266

E02 廣答顯正論之相 266

F01 廣治化人德 267

 G01 依名辨德 267

 G02 釋疑顯德 268

 H01 疑 268

 H02 釋 268

F02 廣治化正論 269

G01	明人王縱惡，則禍生國敗	269
H01	明人民起惡	269
I01	明作惡因	270
I02	明得苦果	270
I03	結	270
H02	明國主起惡	271
I01	表明得苦果	271
I02	明作惡因	271
I03	廣明惡果	272
H03	明諸臣起惡	273

I01 臣行非法	274
I02 明人王許可	274
I03 明得苦報	274
H04 總結	277
I01 明令王民作惡	277
I02 明令得苦	277
I03 明皆由王爾	278
G02 明人王修善，則福至土豐	278
H01 明王不作惡，則人民行善生天	278
H02 明人民作惡得苦，由王縱惡不治	279

H03 明國王治即得國豐樂 279

I01 通誠惡勸善 279

I02 偏明作惡國敗 280

I03 偏明行善土豐 280

G03 結勸捨惡從善 281

⑫ 善集品 282

A01 長行 283

A02 偈釋 283

B01 明因 283

C01 明布施行 283

C02 明智慧行	284
D01 明求法因緣	284
D02 正聽法	287
E01 明受請	287
E02 正為說經	288
E03 明聞法歡喜	289
E04 明報恩供養	290
B02 明得果	290
C01 結會古今	291
C02 明得果	291

C03	合結因果	292
⑬	鬼神品	292
A01	勸眾聽受	293
B01	正勸聽受	293
C01	長行	293
D01	舉供養諸佛功德	293
D02	舉智	294
D03	勸云欲得如上功德智慧應聽是經	294
C02	偈	294
B02	歎經力大	295

C01 歎經力 295

 D01 歎拔苦力 295

 E01 歎經力 295

 E02 明拔苦惱 295

 D02 歎生福慧 296

 E01 明歎經德 296

 E02 明生福慧 296

 F01 明生智慧 296

 F02 明生功德 297

C02 舉益勸聽 297

D01	勸忍苦聽受	297
D02	明聽經有益	298
E01	明聽者滅惡相	298
E02	明說者得勝相	298
E03	令得勝果	299
F01	明得勝果	299
F02	結	300
A02	八部守護	300
B01	明供養	300
B02	明恭敬	301

B03	明讚歎	302
B04	明擁護	302
A03	具諸勝果	306
B01	別明八事	306
B02	總結	310
⑭	授記品	310
A01	明受記眾集	311
A02	明授記	312
B01	明信相記	312
B02	明二子記	312

B03	明諸天記	313
A03	明樹神生疑	314
B01	略表	314
B02	廣釋	314
B03	結請	315
A04	如來釋疑	315
B01	略表	316
B02	釋	316
B03	結	316
⑮	治病品	316

A01	誠許說	317
A02	明正說	317
B01	述本生	317
C01	明本生時處	317
C02	明本生	318
B02	明本事	318
C01	明慈悲體	319
D01	明國人有病	319
D02	明思惟欲救	319
D03	明請問醫方	320

E01 發起	320
E02 正問	320
F01 問病因緣	320
F02 問病飲食	321
F03 問病醫藥	322
F04 問時節	323
D04 明父為說	323
E01 佛序父答	324
E02 父答	324
F01 定時節	324

F02 治病之方	328
G01 明隨時發病	328
H01 答病飲食問	328
H02 答病因緣問	329
H03 答病湯藥問	329
H04 答病時節問	330
H05 重答治病藥問	330
H06 重答病飲食問	331
H07 重答治病藥問	332
G02 明違時動病	333

D05	明聞說得解	333
C02	明慈悲用	333
D01	明善言慰諭	333
D02	輕病即愈 病重者與藥乃愈	334
D03	合結	334
①6	流水長者子品	335
A01	歎除病之德	335
B01	明長者除病	335
B02	明眾生修福	336
A02	明救魚之功	336

B01	明長者救魚	336
C01	明夫妻二子本生	337
C02	明本生事	337
D01	明慈悲體	337
D02	明慈悲用	338
E01	明財施	339
E02	明法施	341
B02	明十千魚報恩	343
C01	明生天	343
C02	明報恩	344

C03	明國王覺悟	345
A03	結會古今	346
⑰	捨身品	347
A01	問	347
A02	答	348
B01	現寶塔	348
C01	明現塔 眾喜神問 佛釋	348
C02	明現舍利 讚歎 禮拜	349
B02	明寶塔緣	350
C01	說舍利因緣	350

D01	長行	350
E01	經家標	351
E02	明如來說	351
F01	明本生	351
F02	明本事	351
G01	明捨身因緣	352
H01	明遊山共議	352
H02	明見虎共議	352
H03	明思惟捨身	354
I01	思惟捨身時至	354

I02	思惟欲捨身	355
I03	發遣二兄	359
G02	明捨身	360
H01	明王子發願捨身，現種種瑞	360
H02	明為虎所食	361
G03	明眷屬悲苦	361
H01	明二兄悲苦	362
H02	明侍從悲苦	363
H03	明父母悲苦	363
D02	偈頌	365

E01	總明捨身大意	365
E02	正頌長行	365
E03	明結會古今	375
C02	明寶塔因緣	375
B03	結酬上問	376
⑱	讚佛品	376
A01	明他方菩薩讚他方佛	377
B01	能讚之人	377
B02	所讚之事	377
C01	讚歎	378

D01 讚色聲	378
E01 歎色相好	378
E02 歎音聲	378
E03 結	379
F01 結聲	379
F02 結色	379
D02 歎福慧	380
E01 歎內德	380
E02 歎外化德	380
F01 表拔苦與樂	380

F02 廣釋	381
G01 明拔苦與樂之體	381
G02 明拔苦與樂之事	381
D03 合結	382
E01 明佛德無量	382
E02 明無人能知	382
E03 明歎不能盡	382
C02 迴向	383
A02 明此土大士歎此世佛	383
B01 信相讚	383

C01 別讚 383

 D01 歎色身 384

 E01 歎色身體 384

 E02 歎色身用 384

 D02 歎福慧 385

 D03 結 385

C02 總歎 385

 D01 歎福慧 386

 E01 外化 386

 E02 內德 386

D02 歎色身	386
E01 外化	386
E02 內德	387
B02 樹神讚	387
C01 能讚人	387
C02 所歎事	387
D01 樹神歎	388
E01 合歎應化二身	388
F01 正歎	388
G01 歎三身體	388

H01 歎智慧	388
I01 表歎	389
I02 釋	389
H02 歎功德	389
G02 歎用	390
H01 總表出世希有	390
H02 明希有事	390
I01 歎外化德	390
I02 歎內證德	391
F02 明渴仰	393

G01	明彼渴仰願見	393
H01	舉念佛善以願見	393
H02	舉禮拜善以願見	393
H03	舉修悲行以願見	393
H04	舉渴仰憂火以願見	394
G02	願佛慈悲攝受	394
H01	願說法水 令滅憂火	394
H02	願佛現身 令我常見	394
H03	結請	394
E02	別歎法身	395

F01 歎法身深智	395
G01 明生死虛妄	395
G02 明法身真實	395
F02 明物不能知	396
E03 結請	396
F01 結法應二身	396
F02 請現化身	397
D02 如來述	397
①9 囑累品	397

金光明經疏

序

法身幽寂，壽無長短。至人絕慮，有感必通。大權方便，任機應說。

是以四佛現室，宣常住之旨。菩薩感夢，說懺悔之方。

因兼二善，總該萬行。果昇靈覺，壽等虛空。

所以十地遵修此理，四王歎護經德。

依經講說，障難消散。託法願求，福樂隨心。

故，此經，以正法中道為體，三點四德為宗。

若具存天竺正音，應言佛陀槃遮修拔那婆羅婆修修多羅也。

佛陀，云覺者。槃遮，云說。而略兩目。修拔那婆羅婆修者，此云金光明。

修多羅者，此云含五義，以經義代之。經者，訓法訓常。亦經，由也。

故云《金光明經》也。

《金光明經》者，乃是究竟大乘菩薩藏攝，是頓教所收。

論其宗極，表三種三法：①表三身佛果，②表涅槃三德，③表三種佛性。

①表三身佛果者。

金體真實，譬法身佛。光用能照，譬應身佛。明能遍益，猶如化身。

②表涅槃三德者。

金體四義，譬法身四德：

色無變如常，體無染如淨，轉作無礙如我，令人富貴如樂也。

光有二義：能照、能除，如般若。

明有兩義：無闇、廣遠，如解脫，總無眾患。

③表三種佛性者。

金體本有，如道前正因。

光用始有，如道內了因。

明是無闇，如道後至果。

以金等三義，譬三種三法。故言《金光明經》也。

與序品，如常釋也。

此三種三義，具在七卷也。此四卷中，大判有三段：

①序品，即是序說分。

②從壽量品訖捨身品，是正說分。

③讚佛一品，是流通說也。

所以有此三段者，有二義：

①就化主說。

若無序說，物不生信心。若無信心，忽為說者，眾生不受，然則如來有空說之過。故有序說。

既有信心，如來不說，則有失機之咎。故有正說。

正說既顯，若無流通，如來即有無大悲失。故有流通說也。

②約所化說者。

眾生入道，信心為初，故有序說。

依信生解，故有正說。

依解起行，故有流通也。

①序說分：序品。

②正說分：於中有二：

(1)明常住因果，即是經體。於中有二：

1.明三身常住，此即是果：壽量品。

2.明修道，即是因行：懺悔品、讚歎品、空品。

(2)明歎經勸學，即經力用。於中有二：

1.明經力大，勸物弘通。於中有二：

⊖明願弘此經：四天王品。

⊖明八部利益弘通之人，於中有四：

大辯天品、功德天品、堅牢地神品、散脂鬼神品。

2.明能弘之人得此經力。於中有二：

①弘宣之人得因益。於中有三：

(一)明信相弘宣：正論品。

(二)明釋迦弘宣：善集品。

(三)明四眾弘宣：鬼神品。

②明得果益。於中有二：

(一)明得果：授記品。前雖明得果之人，未明記莦。故今明得記。得記必由勝因故。

(二)明舉緣修因成得果義。於中有三：

治病品、流水長者子品、捨身品。廣示往因，成得記義。

③流通說：讚佛品、囑累品。

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

金光明經疏

① 序品

有二：①證信序，②發起序。

料簡二序，如《涅槃義疏》中說也。

A01 證信序

如是我聞：

A02 發起序

有二：①通發起，②別發起。

為下正說諸品，通是緣起，故名為通。別為緣起，故名為別。

B01 通發起序

一時，佛住王舍大城。耆闍崛山。

通發起中，應有同聞。而不立者，有三義：

①壽量品，是四佛說，是信相室說，不與千二百等共聞。

②懺悔品，是信相夢中見聞，亦非千二百等共聞。

③讚佛品，他方大士，往他方讚佛，亦非千二百等共居。

有此三義，故不宜立同聞眾也。

斯則說此經，有四時三處。

處三者：信相室、崛山、他土。謂此三也。

四時者，謂：兩晝一夜，及他方讚佛時也。

崛山、舍城，如常釋也。

B02 別發起序

是時，如來遊於無量甚深法性，諸佛行處。

別發起序，與餘經序有異，直以三密，冥加為序。

三密者，身口意密也。

①欲說此經，身在崛山，表此經殊勝。即是身密也。

②意念法性，及四佛護持，乃至懺悔等法。即是意密。

③又，將欲說此等深法。即是口密也。

以此三密，冥加信相，故信相疑念，感四方佛說壽量果。

又，因此三密，信相感夢，說懺悔等法。四天王等，發願弘經。乃至說捨身品。故云三密為發起序也。

有二：①為正說作序，②為流通作序。

C01 為正說作序

有二：①經體四品作序，②經力用十二品作序。

D01 經體作序

有二：①為壽量品作序，②為懺悔品作序。

E01 為壽量品作序

言是時者。有三時：①如來欲說法時，②眾欲聽時，③大眾心無高下時。

如來者。有三如來：

①法身如來者。道前無變異，曰如。道後顯現，曰來。

②應身如來者。乘如實道，曰如。來成正覺，曰來。

③化身如來者，化身化人，不過時不待時，曰如。八相趣果，曰來。

今言如來，正是應身及以化身也。明應身，照法身常樂等。以化身，欲說故也。

遊於無量者。法身之體，無有彼此限量，故言無量。應身智慧，照力有遊，故言遊也。

甚深法性者。法是法身，性是自性。自性真實，故言法性。此之法性，深難

得底，故言甚深。

應身諸佛能窮行之，故言佛行處。

F01 歎經體

過諸菩薩 所行清淨

過諸學地，故言過諸菩薩。無復境智之殊，二障永盡，故言所行清淨。

是金光明 諸經之王

此經名說法身常住，亦表三種三義，故立此名。

過於小乘，故言王也。

F02 歎經用

若有聞者 則能思惟 無上微妙 甚深之義

若有聞者，生聞慧。則能思惟，生思慧也。無上微妙甚深之義，生修慧也。

F03 明能說者

如是經典 常為四方 四佛世尊 之所護持

東方阿閼 南方寶相 西無量壽 北微妙聲

言四方佛者。顯諸佛道同故也。但言四者，欲表四德，故不五不六。

東方不動，表常德也。

南方寶相，寶相是如意珠，有自在力，表我德也。

西方無量壽，是安樂國，表樂德也。

北方微妙聲，聲無穢濁，表淨德。

從上法性，經名經用，能說如此等法。並是如來意念欲所遊之境也。

E02 為懺悔品作序

有三：①表，②釋，③結。

F01 表

我今當說 懺悔等法

初云懺悔，舉懺悔品。等法，即下二品。

亦可懺悔，舉五法中懺悔。

等法者，等取，勸請、隨喜、迴向、發願也。

F02 釋

所生功德 為無有上 能壞諸苦 盡不善業

明因行，謂生善滅惡。

依此懺悔等法，所生功德，餘法無加，故言無上。

亦令離苦滅惡，故言壞盡。此即無行不備，無過不盡也。

一切種智 而為根本 無量功德 之所莊嚴
明果德，謂智慧功德。

一切種智，亦以此懺悔等法，以為根本。

其餘功德，亦是懺悔等法所莊嚴也。

此即是功德智慧，二種莊嚴也。

F03 結

滅除諸苦 與無量樂

滅除諸苦者。拔分段變易二種生死，此結離過。

與無量樂者。與菩提涅槃二種樂也。此結德備。

D02 經力用作序

有二：①明弘經者得經力用也，②追序四王訖散脂品明經力用大。

E01 得經力用

序正之中，前後不同也。

有二：①明所滅惡，②明能滅行。

F01 明所滅惡

有二：①明因現事生惡愁，②明因未現事生惱。

凡世間惡事，不過現與未現，故以此二，攝一切也。

G01 明因現事生惡愁

諸根不具 壽命損減 貧窮困苦 諸天捨離

親厚鬥訟 王法所加 各各忿諍 財物損耗

愁憂恐怖

諸根不具故，愁憂恐怖。

壽命損減故，愁憂恐怖。

貧窮困苦故，愁憂恐怖。

諸天捨離故，愁憂恐怖。

親厚鬥訟故，愁憂恐怖。

王法所加故，愁憂恐怖。

各各忿諍故，愁憂恐怖。

財物損耗故，愁憂恐怖。

G02 明因未現事生惱

惡星災異 眾邪蠱道 變怪相續

臥見惡夢 晝則愁惱

惡星，是天上怪。蠱道，鬼神怪。惡夢，是夢相怪也。

F02 明能滅行

當淨洗浴 聽是經典

至心清淨 著淨潔衣 專聽諸佛 甚深行處

是經威德 能悉消除 如是諸惡 令其寂滅

若有如此等三障惡事者，淨心聽經，即得消滅。

言三障者，不具損滅困苦捨離，是報障也。

鬥訟忿諍，乃至愁惱，通是業煩惱障。

所加損耗，災怪惡夢，是起業煩惱緣。

若弘此經，滅苦生樂，故離報障。滅惡生善，即離業障。滅惑生解，離煩惱障。

E02 經力用大

護世四王 將諸官屬 並及無量 夜叉之眾

悉來擁護 持是經者

大辯天神 尼連河神 鬼子母神 地神堅牢

大梵尊天 三十三天 大神龍王 緊那羅王

迦樓羅王 阿修羅王 與其眷屬 悉共至彼

擁護是人 晝夜不離

追序四王訖散脂品，明經力用大。

此中欲示前弘經有德故，天神守護。後正說中示由天護，乃得弘經故。

C02 為流通作序

有二：①流通壽量品作序，②流通懺悔品下作序。

⑩此中佛自歎經。彼讚佛品，唯歎佛德，若為作序？

⑪經所以尊，由說佛德，故此歎佛。

D01 流通壽量品作序

有四：①歎值得，②明弘經得果，③明勸修行，④明結弘經人。

E01 歎值得

我今所說 諸佛世尊 甚深祕密 微妙行處
億百千劫 甚難得值

E02 明弘經得果

若得聞經 若為他說 若心隨喜 若設供養
如是之人 於無量劫 常為諸天 八部所敬
如是修行 生功德者 得不思議 無量福聚
亦為十方 諸佛世尊 深行菩薩 之所護持

八部所敬、佛菩薩護持者，言外護之果也。

偈無量福聚者，言內心正報也。

E03 明勸修行

著淨衣服 以上妙香 慈心供養 常不遠離

身意清淨 無諸垢穢 歡喜悅豫 深樂是典

慈心供養者，言為眾生與樂心供養此經也。

如淨名經中，為菩提起於慈心，此中亦爾。

凡供養三種：①利養供養，②恭敬供養，③修行供養。

此中供養，唯是恭敬及與修行供養也。

E04 明結弘經人

若得聽聞 當知善得 人身人道 及以正命

人身者，別於餘身。人道者，別於餘道。正命者，別於邪命。

聞經供養，即福慧具足，超於餘人，故言善得。

D02 流通懺悔品作序

若聞懺悔 執持在心 是上善根 諸佛所讚

流通四王以下，經力用序者。本由流通經體得經力用，故不別明。

② 壽量品

言壽量者，以無量為量。真如實相，以無相為相。實際，以無際為際。

有三：①信相疑念，四佛降現，降室現瑞。②明信相請問，四佛為說。③明坐眾利益，四佛不現。

A01 信相疑念，四佛降現，降室現瑞

有四：①明疑念，②念因疑果，③明降現，④現瑞蒙益。

B01 明疑念

爾時，王舍城中，有菩薩摩訶薩，名曰信相，已曾供養過去無量億那由他百千諸佛，種諸善根。

是信相菩薩，作是思惟：何因何緣，釋迦如來壽命短促，方八十年？

言信相者，此是地前菩薩，於理決定，故名為信。

此人曾供養諸佛，深殖善因，故能承佛三密冥加，疑佛八十。

⑩此經，是何時說，疑佛八十？

⑪未涅槃前九十日說。所以知然？從如來出世，至於法花，未有八十之語。說法花已後，告於魔王，唱言：卻後三月涅槃。此時眾生方知正八十年。以此可知，於九十日說。而九十日中，未知是何日說。

方者，將也。二月十五日，入八十而未滿足，曰將。

B02 念因疑果

復更念言：如佛所說：「有二因緣，壽命得長。何等為二？一者不殺、二者施食。」而我世尊，於無量百千億那由他阿僧祇劫，修不殺戒、具足十善。飲食惠施，不可限量，乃至己身骨髓肉血，充足飽滿飢餓眾生，況餘飲食！

大士如是至心念佛思是義。

不殺，是長壽正因，如生母也。施食，是緣因，如乳母也。

B03 明降現

時，其室自然廣博嚴事，天紺琉璃種種眾寶，雜廁間錯，以成其地，猶如如來所居淨土。有妙香氣，過諸天香。煙雲垂布，遍滿其室。

其室四面，各有四寶，上妙高座自然而出，純以天衣而為敷具。是妙座上，各有諸佛所受用花，眾寶合成。

於蓮花上，有四如來：東方名阿閼、南方名寶相、西方名無量壽、北方名微妙聲。

是四如來，自然而坐獅子座上。

B04 現瑞蒙益

放大光明，照王舍城，及此三千大千世界，乃至十方恆河沙等諸佛世界。雨諸天花，作天伎樂。

爾時，三千大千世界，所有眾生，以佛神力，受天快樂。諸根不具，即得具足。

舉要言之，一切世間所有利益，未曾有事，悉具出現。

何故變小室令廣博嚴淨？密顯短而即長。猶如此室，穢而即淨也。

A02 信相請問 四佛為說

有二：①明信相陳疑請問，②明四佛為說。

B01 明信相陳疑請問

爾時，信相菩薩，見是諸佛及希有事，歡喜踊躍，恭敬合掌，向諸世尊，至心念佛。

作是思惟：釋迦如來無量功德，唯壽命中，心生疑惑。云何如來壽命如是，方八十年？

B02 明四佛為說

有三：①試勅略表，②集會廣釋，③雙結。

C01 試勅略表

爾時，四佛以正遍知，告信相菩薩：善男子！汝今不應思量如來壽命短促。

何以故？善男子！我等不見諸天、世人、魔眾、梵眾、沙門、婆羅門、人及非人，有能思算如來壽量，知其齊限。唯除如來。

C02 集會廣釋

時，四如來將欲宣暢釋迦文佛所得壽命，欲色界天、諸龍、鬼神、乾闥婆、阿修羅、迦樓羅、緊那羅、摩睺羅伽，及無量百千億那由他菩薩摩訶薩，以佛神力，悉來聚集信相菩薩摩訶薩室。

明集眾。

爾時，四佛於大眾中，略以偈喻，說釋迦如來所得壽量。而作頌曰：
以偈廣釋。

一切諸水	可知幾滴	無有能數	釋尊壽命
諸須彌山	可知斤兩	無有能量	釋尊壽命
一切大地	可知塵數	無有能算	釋尊壽命
虛空分界	尚可盡邊	無有能計	釋尊壽命
不可計劫	億百千萬	佛壽如是	無量無邊
以是因緣	故說二緣	不害物命	施食無量

諸水、須彌、大地、虛空，雖復難知，並是有相之法，可以意知，可以言論。而三身佛果，三而恆一，一而恆三，然則非一非三，體不可以智知，相不

可以言論，無有數量算計也。

又復，法身本有，無有生滅。報佛與之相應，亦無生滅。

是故，大經云：諸佛所師，所謂法也。以法常故，諸佛亦常。

又，化身如來以二佛為體，以眾生為緣。體無盡故，化身亦無盡也，故云三身常住。如七卷經中明。

應化二身，是相續常者。以菩薩業識所影項背光明三十二相等，合名報佛，同與樂因相應故。

約體論之實是化身，故言念念相續常。若言與理相應之報，是凝然常住。

C03 雙結

是故大士 壽不可計 無量無邊 亦無齊限

是故汝今 不應於佛 無量壽命 而生疑惑

爾時，信相菩薩摩訶薩聞是四佛宣說如來壽命無量，深信信解，歡喜踊躍。

說是如來壽量品時，無量無邊阿僧祇眾生發阿耨多羅三藐三菩提心。

時，四如來忽然不現。

何故四佛不現者，為顯法身不異，迹雖有四，歸處無異故。

③ 懺悔品

果不自得，要因修道，故次明之。即是因門中，宗明緣因。若論正因，在七卷經三身品中，此經略無。

就此因門，有二段：初二品明功德門，即是方便道。後一品明智慧門，即是般若道。

何故明此二：一切因行，不出功德、智慧，故以二門攝盡。

依修二因，得三身果，其義何耶？

修功德故，非二乘行。修智慧故，非凡夫行。非凡夫行故，不在生死。非二乘行故，不住涅槃。即是得化應二身。

不在生死故，即法身究竟，故云得三身果。

又復，修功德故離業障，修智慧故離煩惱障，故與理相應，即得應身。離業障故，隨物無礙，即有化身。二障既離，果報阿梨耶即滅不起，法身之體，究竟顯現。是故欲得三身者，必修功德智慧也。

對三點三性，例此可尋。

就功德門中，二品即為二段。

懺悔品，是佛所說，信相述之。

讚歎品，是信相昔說，佛今述之。

何故明此二者？顯感應之道故也。

信相夢中所見聞事，是如來應，是故信相向佛述之。

今所述讚佛發願，是信相感，是故佛今對信相述之。欲顯見聞不虛，是故明感應相符也。

何故夢中見聞者：欲明菩薩之道，覺夢無異。又，顯如來佛事，不在晝夜。又，由信相願力故也。

言懺悔品者，外國云懺摩毘，此云厭離，亦云改悔。胡漢具存，故云懺悔。

於此品中，具明五法。懺悔在初，故從初為目。

有二：①長行，是經家辭。②偈頌，是信相自陳。

A01 長行

有二：①明信相夢中見聞，②明信相寤已往至佛所說。

B01 明信相夢中見聞

有二：①見如來應，②明見眾生感。

C01 見如來應

爾時，信相菩薩，即於其夜，夢見金鼓，其狀殊大。其明普照，喻如日光。

即於其夜者，說壽量品竟之夜也。

金鼓，喻法身。殊之言妙。妙出生死，名相之外。大者，遍含萬德，故名為大。

依此，法身成應身，應身遍照故，言如日光也。

其明者，此即是光。非是光中之明，故猶應身，非是喻化身也。

復於光中，得見十方無量無邊諸佛世尊，眾寶樹下，坐琉璃座，與無量百千眷屬圍繞而為說法。

明見化佛，即是光中之明。

斯則明見法報二身，但喻無法。化身中有法無喻。而為說法者，明其所聞。

C02 見眾生感

見有一人，似婆羅門，以桴擊鼓，出大音聲，其聲演說懺悔偈頌。

似婆羅門者，信相菩薩位在地前，未得地上真解，故言似也。

信相機桴擊法身之鼓，令出化身音聲，說懺悔等法故。言以桴擊鼓，乃至說

偈頌也。

B02 夢寤往佛

時，信相菩薩，從夢寤已，至心憶念夢中所聞懺悔偈頌。過夜至旦，出王舍城。

爾時，亦有無量無邊百千眾生，與菩薩俱，往耆闍崛山，至於佛所。

至佛所已，頂禮佛足，右繞三匝，卻坐一面，敬心合掌，瞻仰尊顏，目不暫捨。

以其夢中所見金鼓及懺悔偈，向如來說。

明信相寤已，往至佛所說。

A02 偈頌

有二：①陳述所見，②陳述所聞。

B01 陳述所見

昨夜所夢	至心憶持	夢見金鼓	妙色晃耀
其光大盛	明踰於日	遍照十方	恆沙世界
又因此光	得見諸佛	眾寶樹下	坐琉璃座
無量大眾	圍繞說法	見婆羅門	擊是金鼓

B02 陳述所聞

有二：①總標，②別述。

C01 總標

其鼓音中 說如是偈

C02 別述

有四：①明離過行，②明攝善行，③舉利勸修，④歎經難聞。

D01 明離過行

有二：①明歎教勝用，②明離過行體。

E01 明歎教勝用

有三：①明拔苦與樂用，②明滅惡生善德，③結。

F01 明拔苦與樂用

有二：①明拔三種苦，②明與三種樂。

G01 明拔三種苦

是大金鼓 所出妙音 悉能滅除 三世諸苦

地獄餓鬼 畜生等苦 貧窮困苦 及諸有苦

三種苦者：

①三世苦。即是長苦，於三世中長受故。

②三途苦。即是重苦，此苦粗重故。

③三界苦。貧窮，是人中苦。及諸有苦者，是天上苦。是三界苦中，具含行壞二苦，此即是深苦也。

G02 明與三種樂

有三：①明與無畏樂，②明與菩提樂，③明與寂滅樂。

H01 明與無畏樂

是鼓所出 微妙之音 能除眾生 諸惱所逼

斷眾怖畏 令得無懼 猶如諸佛 得無所畏

H02 明與菩提樂

菩提樂者，即是覺智樂也。

有二：①明諸佛所證，②明與菩提樂。

I01 明諸佛所證

諸佛聖人 所成功德 離於生死 到大智岸

欲顯此經，能令眾生如諸佛所證故。

I02 明與菩提樂

有二：①明白利菩提，②明利他菩提。

J01 明白利菩提

如是眾生 所得功德 定及助道 猶如大海
是鼓所出 如是妙音 令眾生得 梵音深遠
證佛無上 菩提勝果

如是眾生，所得功德者，言如諸佛是。

眾生所得定及助道，如海也。定者，謂四空。助道者，謂三十七品等也。超波羅蜜等諸行，越舉助道，故言及也。亦可定者證道者，謂教道，超不住道，故言及也。此一行明菩提因圓。因行既圓，即菩提果滿，故言令得梵音勝果。

梵音者有五德：①深如雷，②清徹遠聞，③諦了易解，④眾生愛敬，⑤聽者無厭。有此五德，名為梵音，此是化身菩提。

勝果者，此是法報二身菩提也。

直明化佛，梵音體相，即是自利。故以化身，亦名自利菩提。

J02 利他菩提

轉無上輪 微妙清淨 住壽無量 不思議劫

演說正法 利益眾生

三身既滿，轉無上妙法，授與眾生，住無量劫，為說正法，究竟利益，故言轉無上輪，乃至利益眾生。

H03 與寂滅樂

能害煩惱 消除諸苦 貪瞋癡等 悉令寂滅

寂滅樂者，即是蘇息樂。

言寂滅樂者，是無為樂也

是經能治總緣所逼一切怖畏，令得如佛無畏也。

F02 明滅惡生善德

有四：①明生信，②明生解，③明生行，④明令願滿。

G01 明生信

若有眾生 處在地獄 大火熾燃 燒炙其身

若聞金鼓 微妙音聲 所出言教 即尋禮佛

若眾生在獄受苦，聞此金鼓所出言教，尚得生信禮佛，何況人天不蒙利益。

故偏舉地獄人也。

G02 明生解

亦令眾生 得知宿命 百生千生 千萬億生

令心正念 諸佛世尊 亦聞無上 微妙之言

令知宿世善惡因果，亦令正念諸佛，聞無上法，分別邪正也。

G03 明生行

是金鼓中 所出妙音 復令眾生 值遇諸佛

遠離一切 諸惡業等 善修無量 白淨之業

言令值諸佛修道之緣，離於惡業也。

G04 明令願滿

諸天世人 及餘眾生 隨其所思 諸所願求

如是金鼓 所出之音 皆悉能令 成就具足

無不具足信解行願滿。

既以具足，不信等惡，自然滅盡，故言滅惡生善。

F03 結

但結拔苦，其餘略不結之。

有四：①舉地獄重苦，②舉流轉長苦，③總舉重苦及深苦，④總結滅苦。

G01 舉地獄重苦

若有眾生 墮大地獄 猛火炎熾 焚燒其身

G02 舉流轉長苦

無有救護 流轉諸難 當令是等 悉滅諸苦

G03 總舉重苦及深苦

若有眾生 諸苦所切 三惡道報 及以人中

G04 總結滅苦

如是金鼓 所出之音 悉能滅除 一切諸苦

E02 明離過行體

離過行體，不出五種。五種者何？所謂懺悔、勸請、隨喜、迴向、發願。

菩薩何故行此五法者，欲反起惡根本心故。

起罪根本，亦有五種：①無慚愧心，②不樂佛法心，③嫉妬心，④三有取著心，⑤懈怠心也。

①懺悔。以慚愧心為體故，對翻第一心。然，慚愧有三人：

1. 慚愧師友，見處不犯，不見處則犯，此是下品人。
2. 慚愧佛與天，憶時不犯，不憶則犯，此是中品人。

3.愧自身與諸佛同性，而諸佛已證已得，己性我獨未得，故愧自身，不作諸惡，此是上品人。

②勸請。以樂佛求法心為體，故對翻第二。

③隨喜。以四等中，喜心為體，故對翻第三。

④迴向。以菩提心為體，故對翻第四。

⑤發願。以願樂利益自他心為體，故對翻第五。

故釋論云：菩薩六時行五法也。

所有三障，不出因緣、時節、處所，故以此三，攝一切盡。

F01 懺悔

有三：①約起惡因緣以明懺悔，②就造惡時節以明懺悔，③據作惡及受報果

處以明懺悔。

所有三障，不出因緣、時節、處所。故以此三，攝一切盡。

G01 約起惡因緣以明懺悔

有三：①明發願，②明勸請，③明懺悔體。

H01 明發願

無依無歸 無有救護 我為是等 作歸依處

發願，即是滅罪內因。

先發願者，菩薩修行，必以菩提心為依止故。所修諸行，異於二乘凡夫。故攝論云：菩薩波羅蜜，依止無等也。是故此中，為諸眾生無依護者，起作歸處願也。

H02 明勸請

是諸世尊 今當證知 久已於我 生大悲心

在在處處 十方諸佛 現在世雄 兩足之尊

勸請，即滅罪外緣。

明勸請者，雖有滅罪內因，若無外勝緣，其罪難治，故須必請諸佛作悔化主也。如世間人對首，請悔主也。

H03 明懺悔體

因緣既具故，次明懺愧責。

有二：①總懺，②別懺。

I01 總懺

我本所作 惡不善業 今者懺悔 諸十力前

I02 別懺

不識諸佛 及父母恩 不解善法 造作眾惡

明內因不別愚癡，外緣勝思善業，造作眾惡。

自恃種姓 及諸財寶 盛年放逸 作諸惡行

明內因憍慢放逸，外緣種性財年。

心念不善 口作惡業 隨心所作 不見其過

明內因三業，外緣不見其過。

凡夫愚行 無知闇覆 親近惡友 煩惱亂心

明內因愚癡，外緣近惡友。

五欲因緣 心生忿恚 不知厭足 故作眾惡
明內因瞋貪，外緣五欲。

親近非聖 因生慳嫉 貧窮因緣 姦諂作惡
明內因慳嫉姦諂，外緣非聖貧窮。

繫屬於他 常有怖畏 不得自在 而造諸惡
明內因怖畏，外繫屬他。

貪欲恚癡 擾動其心 渴愛所逼 造作眾惡
明內因三毒渴愛，外緣諸法。

依因衣食 及以女色 諸結惱熱 造作眾惡
明內因諸結，外緣衣食女色。

身口意惡 所集三業 如是眾罪 今悉懺悔
明總舉三業悔責。

或不恭敬 佛法聖眾 如是眾罪 今悉懺悔

或不恭敬 緣覺菩薩 如是眾罪 今悉懺悔

明內因三毒憍慢，外緣三寶三乘。

以無智故 誹謗正法 不知恭敬 父母尊長

如是眾罪 今悉懺悔

明內因無智，外緣正法父母師長。

愚惑所覆 驕慢放逸 因貪恚癡 造作諸惡

如是眾罪 今悉懺悔

總舉結懺。

G02 據造惡時節以明懺悔

有三：①明發願為內因，②明諸佛為外緣，③明懺悔。

H01 明發願為內因

有三：①明願上供諸佛，②明願下化眾生，③明願得佛果。

I01 明願上供諸佛

我今供養 無量無邊 三千大千 世界諸佛

I02 明願下化眾生

有二：①願令離苦得樂，②願令滅惡生善。

J01 願令離苦得樂

有三：①明令離苦，②明令得樂，③結離苦。

我當拔濟 十方一切 無量眾生 所有諸苦
明令離苦。

我當安止 不可思議 阿僧祇眾 令住十地
已得安止 住十地者 悉令具足 如來正覺
明令得樂。

為一眾生 億劫修行 使無量眾 令度苦海
結離苦。

J02 明願令滅惡生善

有三：①願為說悔法，②教懺悔方法，③結歎經力能滅障。

我當為是 諸眾生等 演說微妙 甚深悔法
願為說悔法。

所謂金光 滅除諸惡 千劫所作 極重惡業
若能至心 一懺悔者 如是眾罪 悉皆滅盡
教懺悔方法。

我今已說 懺悔之法
是金光明 清淨微妙 速能滅除 一切業障
結歎經力能滅障。

I03 明願得佛果

有二：①願得佛果下化眾生，②廣釋。

J01 願得佛果下化眾生

我當安止 住於十地 十種珍寶 以為腳足

成佛無上 功德光明 令諸眾生 度三有海

住十地者，謂十種法界體。十種珍寶者，謂十波羅蜜行。此波羅蜜涉十種法界，名為腳足。亦可以十波羅蜜為因足，建立佛果故名腳足。

J02 廣釋

諸佛所有 甚深法藏 不可思議 無量功德

一切種智 願悉具足 百千禪定 根力覺道

不可思議 諸陀羅尼 十力世尊 我當成就

甚深法藏者，是佛所知甚深之理，有無量德也。

一切種智者，願得智慧果。百千禪定下，願功德果就。

H02 明諸佛為外緣

有三：①標，②釋，③結。

I01 標

諸佛世尊 有大慈悲 當證微誠 哀受我悔

I02 釋

有二：①明我有惡怖畏故請，②明佛有大悲能治故請。

J01 明我有惡怖畏故請

若我百劫 所作眾惡 以是因緣 生大憂苦
貧窮困乏 愁熱驚懼 怖畏惡業 心常怯劣

在在處處 暫無歡樂

J02 明佛有大悲能治故請

十方現在 大悲世尊 能除眾生 一切怖畏

願當受我 誠心懺悔 令我恐懼 悉得消除

I03 結

我之所有 煩惱業垢 惟願現在 諸佛世尊

以大悲水 洗除令淨

H03 明懺悔

過去諸惡 今悉懺悔 現所作罪 誠心發露

所未作者 更不敢作 已作之業 不敢覆藏

就三世懺悔。

身業三種 口業有四 意三業行 今悉懺悔

身口所作 及以意思 十種惡業 一切懺悔

就十惡懺悔。

遠離十惡 修行十善 安止十住 逮十力尊

所造惡業 應受惡報 今於佛前 誠心懺悔

總舉結懺。

G03 作惡及受報處以明懺悔

有二：①明迴向，②正悔。

H01 明迴向

若此國土 及餘世界 所有善法 悉以迴向

我所修行 身口意業 願於來世 證無上道

明迴向者，源在世間六趣作惡受報，本由取著三有故。發迴向之心，對翻其根。

H02 明正悔

有二：①總懺，②別懺。

I01 總懺

有二：①舉六趣惡業以總懺，②舉生死煩惱以總懺。

J01 舉六趣惡業以總懺

若在諸有 六趣嶮難 愚癡無智 造作眾惡

今於佛前 皆悉懺悔

J02 舉生死煩惱以總懺

世間所有 生死嶮難 種種婬欲 愚煩惱難

如是諸難 我今懺悔

I02 別懺

心輕躁難 近惡友難 三有嶮難 及三毒難

遇無難難 值好時難 修功德難 值佛亦難

如是諸難 今悉懺悔

輕躁難者，謂心無主當，即是散亂煩惱。若配八難，即是世智。

近惡友難者，即是惡緣。若配八難，即是無相天等外道也。

三有嶮難者，謂起惡處所。若配八難，即是北鬱單越，無求出世意故。

三毒難者，謂起惡內因。若配八難，即是三途：多癡生畜生，多貪墮餓鬼，多瞋入地獄故地。

無難難者，謂惡報也。若配八難，即是根不具足難。

值好時難下，明作惡時節。若配八難，即是佛前佛後。

明離過行竟。

懺悔中雖具懺三障，若隱顯互論，第一段以煩惱為宗，第二段以業為宗，第三段以報障為宗。故以三障判文亦得。

又，五法中但有懺悔、勸請、發願、迴向四法，隨喜略無。若隨義為言，於下化眾生願中兼攝，故不別明也。

D02 明攝善行

有四：①明勸請，②明發願，③明隨喜，④明迴向。但有四法，懺悔略無。

E01 明勸請

文中，無勸請正語，但有讚歎之辭。而今作義體者，所以頂禮讚歎。意在請住說法，故名勸請。

有二：①歎佛德，②明歎。

文中，不過應化二身。若歎色，文即是歎化身。若歎大智大悲等，即是歎應身。

F01 歎佛德

諸佛世尊 我所依止 是故我今 敬禮佛海

金色晃耀	猶如須彌	是故我今	頂禮最勝
其色無上	如天真金	眼目清淨	如紺琉璃
功德威神	名稱顯著	佛曰大悲	滅一切闇
善淨無垢	離諸塵翳	無上佛曰	大光普照
煩惱火熾	令心焦熱	唯佛能除	如月清涼
三十二相	八十種好	莊嚴其身	視之無厭
功德巍巍	明網顯耀	安住三界	如日照世
猶如琉璃	淨無瑕穢	妙色廣大	種種各異
其色紅赤	如日初出	頗梨白銀	校飾光網
如是種種	莊嚴佛曰		

三有之中	生死大海	潦水波蕩	惱亂我心
其味苦毒	最為粗澀	如來網明	能令枯涸
妙身莊嚴	相好殊特	金色光明	遍照一切
智慧大海	彌滿三界	是故我今	稽首敬禮

F02 明歎

如大海水	其量難知	大地微塵	不可稱計
諸須彌山	難可度量	虛空邊際	亦不可得
諸佛亦爾	功德無量	一切有心	無能知者
於無量劫	極心思惟	不能得知	佛功德邊
大地諸山	尚可知量	毛滴海水	亦可知數

諸佛功德 無能知者

E02 明發願

相好莊嚴有五：①通為自他發願，②別為自發願，③別為他發願，④結為自發願，⑤結為他發願。隨喜迴向，文相可知。

F01 通為自他發願

相好莊嚴 名稱讚歎 如是功德 令眾皆得
令眾皆得者，言我與眾生，共一眾故也。

F02 別為自發願

我以善業 諸因緣故 來世不久 成於佛道
講宣妙法 利益眾生 度脫一切 無量諸苦

摧伏諸魔	及其眷屬	轉於無上	清淨法輪
住壽無量	不思議劫	充足眾生	甘露法味
我當具足	六波羅蜜	猶如過佛	之所成就
斷諸煩惱	除一切苦	悉滅貪欲	及恚癡等
我當憶念	宿命之事	百生千生	千萬億生
常當至心	正念諸佛	所說微妙	無上正法
我因善業	常值諸佛	遠離諸惡	修諸善業

F03 別為他發願

有二：①明拔苦願，②明與樂願。

G01 明拔苦願

一切世界	所有眾生	無量苦惱	我當悉滅
若有眾生	諸根毀壞	不具足者	悉令具足
十方世界	所有病苦	羸瘦頓乏	
無救護者	悉令解脫		
如是諸苦	還得勢力	平復如本	
若犯王法	臨當刑戮	無量怖畏	愁憂苦惱
如是之人	悉令解脫		
若受鞭撻	繫縛枷鎖	種種苦事	逼切其身
無量百千	愁憂驚畏	種種恐懼	擾亂其心
如是無邊	諸苦惱等	願使一切	悉得解脫

若有眾生	飢渴所惱	令得種種	甘美飲食
盲者得視	聾者得聽	瘡者得言	裸者得衣
貧窮之者	即得寶藏	倉庫盈溢	無所乏少
一切皆受	安隱快樂	乃至無有	一人受苦

G02 明與樂願

眾生相視	和顏悅色	形貌端嚴	人所喜見
心常思念	他人善事	飲食飽滿	功德具足
隨諸眾生	之所思念	皆願令得	種種伎樂
箏篴箏笛	琴瑟鼓吹	如是種種	微妙音聲
江河池沼	流泉諸水	金花遍布	及優鉢羅

隨諸眾生	之所思念	即得種種	衣服飲食
錢財珍寶	金銀琉璃	真珠璧玉	雜廁瓔珞
願諸眾生	不聞惡聲	乃至無有	可惡見者
願諸眾生	色貌微妙	各各相於	共相愛念
世間所有	資生之具	隨其所念	悉令具足
願諸眾生	諸所求索	如其所須	應念即得
香花諸樹	常於三時	雨細末香	及塗身香
眾生受者	歡喜快樂		
願諸眾生	常得供養	不可思議	十方諸佛
無上妙法	清淨無垢	及諸菩薩	聲聞大眾

願諸眾生 常得遠離 三惡八難 值無難處

觀觀諸佛 無上之王

願諸眾生 常生尊貴 多饒財寶 安隱豐樂

上妙色像 莊嚴其身 功德成就 有大名稱

願諸女人 皆成男子 具足智慧 精勤不懈

一切皆行 菩薩之道 勤心修習 六波羅蜜

常見十方 無量諸佛 坐寶樹下 琉璃座上

安住禪定 自在快樂 演說正法 眾所樂聞

F04 結為自發願

若我現在 及過去世 所作惡業 諸有嶮難

應得惡果 不適意者 願悉滅盡 令無有餘

F05 結為他發願

若諸眾生 三有繫縛 生死羅網 彌密堅固

願以智刀 割斷破裂 除諸苦惱 早成菩提

E03 明隨喜

若此閻浮 及餘他方 無量世界 所有眾生

所作種種 善妙功德 我今深心 隨其歡喜

E04 明迴向

我今以此 隨喜功德 及身口意 所作善業

願於來世 成無上道 得淨無垢 吉祥果報

D03 舉利勸修

中有二：①明修因離過，②明修因得果。

E01 明修因離過

若有敬禮	讚歎十力	信心清淨	無諸疑網
能作如是	所說懺悔	便得超越	六十劫罪

E02 明修因得果

諸善男子	及善女人	諸王刹利	婆羅門等
若有恭敬	合掌向佛	稱歎如來	並讚此偈
在在生處	常識宿命	諸根具足	清淨端嚴
種種功德	悉皆成就		

在在處處 常為國王 輔相大臣 之所恭敬

D04 歎經難聞

非於一佛 五佛十佛 種諸功德 聞是懺悔

若於無量 百千萬億 諸佛如來 種諸善根

然後乃得 聞是懺悔

④ 讚歎品

明功德門中，信相昔說，佛今述之。來意有二：

①證上懺悔品，夢中見聞，由信相昔日讚歎發願力有之。

②讚上夢中見聞，非是妄相。

此二顯感應符會也。

此品中，大意具述五法，但讚歎在初，故從初名品。

有三：①長行，②偈頌，③結會古今。

A01 長行 舉能歎者

爾時，佛告地神堅牢：善女天！過去有王，名金龍尊，常以讚歎，讚歎去來現在諸佛：

何故偏對地神述信相事者，此地神有緣，故偏對之。

A02 偈頌 正述信相昔日讚佛等事

有三：①明讚歎，②明迴向，③明發願。

若隨義攝之，隨喜在於迴向發願文中，懺悔攝在餘願文中。

B01 明讚歎

即是勸請。

有三：①總歎，②別歎，③歎不可盡。

C01 總歎

我今尊重 敬禮讚歎 去來現在 十方諸佛

C02 別歎

有二：①明正歎，②明三業供養。

諸佛清淨 微妙寂滅 色中上色 金光照耀

於諸聲中 佛聲最上 猶如大梵 深遠雷音

其髮紺黑 光螺焰起 蜂翠孔雀 色不得喻

其齒鮮白 猶如珂雪 顯發金顏 分齊分明

其目修廣	清淨無垢	如青蓮花	映水開敷
舌相廣長	形色紅輝	光明照耀	如花初生
眉間毫相	白如珂月	右旋潤澤	如淨琉璃
眉細修揚	形如月初	其色黑耀	過於蜂王
鼻高圓直	如鑄金鋌	微妙柔軟	當于面門
如來勝相	次第最上	得味真正	無與等者
一一毛孔	一毛旋生	軟細紺青	猶孔雀項

於中，舉其色、聲、髮、齒、目、舌、毫相、眉細、鼻高、得味、毛生，各以一行偈，次第歎之。

即於生時	身放大光	普照十方	無量國土
------	------	------	------

滅盡三界	一切諸苦	令諸眾生	悉受快樂
地獄畜生	及以餓鬼	諸人天等	安隱無患
悉滅一切	無量惡趣		
身色微妙	如融金聚	面貌清淨	如月盛滿
佛身明耀	如日初出	進止威儀	猶如獅子
修臂下垂	立過于膝	猶如風動	娑羅樹枝
圓光一尋	能照無量	猶如聚集	百千日月
佛身淨妙	無諸垢穢	其明普照	一切佛刹
佛光巍巍	明焰熾盛	悉能隱蔽	無量日月
佛日燈炬	照無量界	皆令眾生	尋光見佛

別舉生時，放光利物，身色、面貌、明燿、威儀、循臂、圓光、佛身淨妙、佛光魏魏、佛日普照等，一一歎之。

本所修習 百千行業 聚集功德 莊嚴佛身
臂傭纖圓 如象王鼻 手足淨軟 敬愛無厭
去來諸佛 數如微塵 現在諸佛 亦復如是
如是如來 我今悉禮

別舉自來歎臂手足色。

身口清淨 意亦如是 以妙香花 供養奉獻
百千功德 讚詠歌歎

三業供養，歎不能盡

C03 明歎不可盡

設以百舌	於千劫中	歎佛功德	不能得盡
如來所有	現世功德	種種深固	微妙第一
設復千舌	欲讚一佛	尚不能盡	功德少分
況欲歎美	諸佛功德		
大地及天	以為大海	乃至有頂	滿其中水
尚以一毛	知其滴數	無有能知	佛一功德

B02 明迴向

我今以禮	讚歎諸佛	身口意業	悉皆清淨
一切所修	無量善業	與諸眾生	證無上道

B03 明發願

有二：①結前起後，②明發願。

C01 結前起後

如是人王 讚歎佛已 復作如是 無量誓願

C02 明發願

於中有十願，即為十段。

D01 願夢見金鼓得聞懺悔之聲

若我來世 無量無邊 阿僧祇劫 在在生處

常於夢中 見妙金鼓 得聞懺悔 深奧之聲

D02 願得如來面貌清淨

今所讚歎 面貌清淨 願我來世 亦得如是

D03 願夢見如來晝如實說

諸佛功德 不可思議 於百千劫 甚難得值

願於當來 無量之世 夜則夢見 晝如實說

D04 願行六度先人後己

我當具足 修行六度 濟拔眾生 越於苦海

然後我身 成無上道 令我世界 無與等者

別有願得佛文句。此中願成道者，意先人後己也。

D05 願值釋迦得授記莛

奉貢金鼓 讚佛因緣 以此果報 當來之世

值釋迦佛 得受記莧 並令二子 金龍金光
常生我家 同共受記

D06 願為作眾生依止處

若有眾生 無救護者 眾苦逼切 無所依止
我於當來 為是等輩 作大救護 及依止處
能除眾苦 悉令滅盡 施與眾生 諸善安樂

D07 願煩惱業海悉竭無餘

有二：①誓行道，②正願。

E01 誓行道

我未來世 行菩薩道 不計劫數 如盡本際

E02 正願

以此金光 懺悔因緣 使我惡海 及以業海
煩惱大海 悉竭無餘

D08 願得如來眾德具足

我功德海 願悉成就 智慧大海 清淨具足
無量功德 助菩提道 猶如大海 珍寶具足
以此金光 懺悔力故 菩提功德 光明無礙
慧光無垢 照徹清淨 我當來世 身光普照
功德威神 光明焰盛 於三界中 最勝殊特
諸功德力 無所減少

D09 願拔眾生苦與眾生樂

當度眾生 越於苦海 並復安置 功德大海

D10 願得淨國土猶如諸佛

有二：①誓行道，②正願。

E01 誓行道

來世多劫 行菩提道 如昔諸佛 行菩提者

E02 正願

三世諸佛 淨妙國土 諸佛至尊 無量功德

令我來世 得此殊異 功德淨土 如佛世尊

諸願之初，皆應誓行道。

A03 結會古今

信相當知 爾時國王 金龍尊者 則汝身是

爾時二子 金龍金光 今汝二子 銀相等是

銀相等者，於下授記品，即是銀相銀光也。

⑤ 空品

明波若以導前功德。

有三：①序略說之意，②正說空理，③明觀空利益以勸修。

A01 序略說之意

有三：①表今略說，②釋略說意，③明此說略令蒙眾生機。

B01 表今略說

無量餘經 已廣說空 是故此中 略而解說

無量餘經者，指波若等經中，廣明有無內外等法悉空寂，故言廣說。

今此經中，但明有法與內法空，故名略說。

凡廣略之意，亦不可定。若就理為言，廣為利根，略為鈍根。若就教為論，廣為鈍根，略為利根。

B02 釋略說意

眾生根鈍 劣於智慧 不能廣知 無量空義

故此尊經 略而說之

又復，莫問教之與理，廣為利根，略為鈍根。鈍根之徒，無總持力，少智慧故。

B03 明此說略令蒙眾生機

有二：①知機，②說教。

C01 知機

異妙方便 種種因緣 為鈍根故 起大悲心

異妙方便者，明今此略說，異昔廣說。功稱物機，故言異妙。

種種因緣者，謂下文所說種種事也。

若廣說無利，略說有益，故言起大悲也。

C02 說教

今我演說 此妙經典 如我所解 知眾生意

如我所解者，言今此妙典，如證而說。但知眾生樂略之意，不能廣說耳。

A02 正說空理

有二：①明人空，②明法空。

B01 明人空

有二：①明五非常門，②明結觀空。

C01 明五非常門

五非常門者，明眾生之身，無我、無常、空、苦、不淨。此是俗諦觀也。

身即如是，何處有人。

本性空寂，此即真諦觀也。

五非常門，即為五段。

有五：①明無我門，②明無常門，③明空門，④明苦門，⑤明不淨門。

D01 明無我門

是身虛偽 猶如空聚 六入村落 結賊所止

一切自住 各不相知

眼根受色 耳分別聲 鼻嗅諸香 舌嗜於味

所有身根 貪受諸觸 意根分別 一切諸法

六情諸根 各各自緣 諸塵境界 不行他緣

身猶如空聚，結賊所止，無有真主，即遣離我。

一切諸根，各住自性，不能相知。

各緣自境，不能互緣，無有自在，此是即遣我也。

D02 明無常門

心如幻化 馳騁六情 而常妄想 分別諸法

猶如世人 馳走空聚 六賊所害 愚不知避

心常依止 六根境界 各各自知 所伺之處

隨行色聲 香味觸法 心處六情 如鳥投網

其心在在 常處諸根 隨逐諸塵 無有暫捨

心識如幻，自生自滅。馳騁分別，六塵所害。

又，常依止六根及境，各在所伺，在處則滅，不能至於異處。如鳥投在細網即死。

D03 明空門

身空虛偽 不可長養 無有諍訟 亦無正主

從諸因緣 和合而有 無有堅實 妄想故起

業力機關 假偽空聚

言身虛偽，雖有衣食，無可長養。亦無自我，與他諍訟。亦無自性，為身正主。但從因緣，妄想緣起，如機關木人也。

D04 明苦門

地水火風 合集成立 隨時增減 共相殘害

猶如四蛇 同處一篋 四大虺蛇 其性各異

二上二下 諸方亦二 如是蛇大 悉滅無餘

地水二蛇 其性沉下 風火二蛇 性輕上升

四大相違，風火上昇，地水二下。

又復風火，其性是陽，向東向南。地水陰性，向西與北。故言：諸方亦二。

D05 明不淨門

心識二性 躁動不停 隨業受報 人天諸趣

隨所作業 而墮諸有

明種子不淨。

心是梨耶識，是六七二識躁動，起業煩惱不淨種子。受六道身，故言：種子不淨。

水火風種 散滅壞時 大小不淨 盈流於外

明外相不淨。

體生諸蟲 無可愛樂 捐棄塚間 如朽敗木

明究竟不淨。

C02 明結觀空

善女當觀 諸法如是 何處有人 及以眾生
本性空寂 無明故有

明真諦。

B02 明法空

有二：①明色法空，②明心法空。

C01 明色法空

如是諸大 一一不實 本自不生 性無和合
以是因緣 我說諸大 從本不實 和合而有

性無和合者，言四大本是不生故也。

C02 明心法空

無明體相	本自不有	妄想因緣	和合而有
無所有故	假名無明	是故我說	名曰無明
行識名色	六入觸受	愛取有生	老死愁惱
眾苦行業	不可思議	生死無際	輪轉不息
本無有生	亦無和合	不善思惟	心行所造

無所有故，假名無明者，尋無明之體，即是真如淨心，何處別有無明體相。

故以假名，名為無明。猶如波浪，離水無別也。

A03 明觀空利益以勸修

有二：①舉果益以勸修，②舉因益以勸修。

B01 舉果益以勸修

有二：①明自利果，②明利他果。

C01 明自利果

我斷一切 諸見纏等 以智慧刀 裂煩惱網

我斷一切者，謂釋迦我佛，果由觀空理，斷見纏等，裂諸煩惱。汝等亦應欲斷煩惱，宜修空觀，故名勸修。此是斷德下之勸意，類此可尋。

五陰舍宅 觀悉空寂 證無上道 微妙功德

明智慧德果。

C02 明利他果

有二：①明轉法輪果，②明攝化眾生果。

D01 明轉法輪果

有二：①就理明轉，②就教明轉。

E01 就理明轉

開甘露門 示甘露器 入甘露城 處甘露室

令諸眾生 食甘露味

開甘露門等句，就能化人說。一往略說，名開委悉，分別為示。

甘露譬涅槃果，如世間人，食天甘露，得生死果。涅槃亦爾。

入甘露城下四句，就所化人說：

入甘露城，明聞慧。聞慧未證，名入城。

思慧近證，名處甘露室。

修慧證得，名食甘露味。

同《法花經》中開示悟入。彼經開示，即同此經開示。彼經云入，此經名入處。彼經云悟，即此經名食味。

E02 就教明轉

吹大法螺 擊大法鼓 燃大法炬 雨勝法雨

吹法螺者，如世間人欲改年號，必以吹螺。如來亦爾，欲改小乘名字章句，必說大乘教法。

擊法鼓者，如世鼓聲，近遠皆聞，齊心破敵。大乘教法亦爾，令一切聞，進入勝境，破煩惱敵，故名擊鼓。

燃法燈者，如世燈照了萬物，令一切見。佛亦如是，說大乘顯了諸法，令得一切智，故名然燈。

雨法雨者，如世間雨，令五穀增長。佛教亦爾，令善根增長。

依《法花論》，如此解也。

D02 明攝化眾生果

有二：①明摧邪德，②明拔苦德。

E01 明摧邪德

我今摧伏 一切怨結 豎立第一 微妙法幢

摧邪德，即是降天魔也。

E02 明拔苦德

度諸眾生 於生死海 永斷三惡 無量苦惱

煩惱熾燃 燒諸眾生 無有救護 無所依止

我以甘露 清涼美味 充足是輩 令離焦熱

拔苦德，即是化六道也。

B02 舉因益以勸修

有二：①明難行能行，②明難捨能捨。

C01 明難行能行

於無量劫 遵修諸行

明長時修。

供養恭敬 諸佛世尊

明恭敬修。

堅固修習 菩提之道

明無間修。

求於如來 真實法身

明餘修。

難行能行，即是《攝論》中四修也。

C02 明難捨能捨

捨諸所重 肢節手足 頭目髓腦

明內施。

所愛妻子

明內外施。

錢財珍寶 真珠瓔珞 金銀琉璃 種種異物

明外施也。

⑥ 四天王品

又，四天王者，住須彌四埵名那乾訶羅山，去地四萬二千由旬，縱廣亦爾。

上有四王：

東方天王，名提頭賴吒，此云持國，領諸天眾並乾闥婆及毘舍闍二部鬼神。

南方天王，名毘留勒，此云增長，主領諸天眾並鳩槃荼及避脇多二部鬼神。

西方天王，名毘留博叉，此云雜語，領諸天眾及龍並富單那二部鬼神。

北方天王，名毘沙門，此云多聞，領諸天眾及夜叉並羅刹二部鬼神。

故名四天王品。

品中有三：

①明四王願弘。②明四王歎佛，如來歎經。③明四王歡喜，供養發願。

A01 明四王願弘

如來述成經力大，故四王願弘之。願弘合理，故佛述之。

有三：①出能弘人，②歎所弘法，③明法為人弘。

B01 出能弘人

爾時，毘沙門天王、提頭賴吒天王、毘留勒叉天王、毘留博叉天王，俱從座起，偏袒右肩，右膝著地，胡跪合掌。

B02 歎所弘法

有二：①歎經德重，②歎經多能。

C01 歎經德重

有三：①明此經顯性德之因，②明經生修德之道，③明經成修德之果。

D01 諸佛愛重，明此經顯性德之因

白佛言：世尊！是《金光明》微妙經典，眾經之王。

歎法。如金光明：法身性因如金，波若性因如光，解脫性因如明。譬三身佛性，亦得也。

D02 諸天禮敬 明經生修德之道

諸佛世尊之所護念，莊嚴菩薩深妙功德，常為諸天之所恭敬。

諸佛世尊，明人。人是諸佛應身，以法為師。言護念。

如《大經》云：諸佛所師，所謂法也。

次歎法。法能生菩薩行之道，故言莊嚴菩薩深妙功德。

次明人。人能如說修行於道，故為諸天恭敬。

D03 四王讚佛 明經成修德之果

能令天王，心生歡喜，亦為護世之所讚歎。

先歎法。法成四德，令諸天願樂，故言歡喜。

次明人。人心歡喜，故口讚歎，故言亦為所歎也。

C02 歎經多能

明由多能故德重，德重故多能也。

有三：①生智慧，②與快樂，③明滅苦。

D01 生智慧

此經，能照諸天宮殿。

照諸王宮，令生智慧故。

D02 與快樂

是經，能與眾生快樂。

D03 明滅苦

有二：①別明，②總結。

E01 別明

是經，能令地獄、餓鬼、畜生諸河焦乾枯竭。

是經，能除一切怖畏。

是經，能卻他方怨賊。

是經，能除穀貴饑饉。

是經，能愈一切疫病。

是經，能滅惡星變異。

是經，能除一切憂惱。

於中有七苦：所謂三途、怖畏、怨賊、饑饉、疾病、惡星、憂惱也。

E02 總結

舉要言之，是經能滅一切眾生無量無邊百千苦惱。

B03 明法為人弘

有二：①明四王聞經獲利，②發願弘通。

C01 明四王聞經獲利

世尊！是《金光明》微妙經典，若在大眾廣宣說時，我等四王及餘眷屬，聞此甘露無上法味，增益身力，心進勇銳，具諸威德。

心進勇銳者，明智慧也。

C02 發願弘通

發願弘通，由獲利故也。

於中，有五番，大為二別：

①初一番，明四王自願擁護，佛即述成。

②餘四番，勸他弘通，如來述成。

D01 明四王自願擁護

有二：①王願護，②如來述。

E01 王願護

有二：①四王自明有弘護德，②正發願。

F01 四王自明有弘護德

世尊！我等四王，能說正法，修行正法。為世法王，以法治世。

世尊！我等四王及天、龍、鬼神、乾闥婆、阿修羅、迦樓羅、緊那羅、摩睺羅伽，以法治世，遮諸惡鬼啖精氣者。

能說者，能說十二部也。修行者，六度。此兩句明出世德。

為世法王，明世間德。以法治世，遮諸惡鬼等，是世間德也。

F02 正發願

有二：①願護國。②願護人。

G01 願護國

世尊！我等四王二十八部諸鬼神等，及無量百千鬼神，以淨天眼過於人眼，常觀擁護此閻浮提。

世尊！是故我等名護世王。

若此國土，有諸衰耗、怨賊侵境、饑饉疾疫，種種艱難。若有比丘，受持是經，我等四王當共勸請，令是比丘，以我等力故，疾往彼所，國邑郡縣，廣宣流布是《金光明》微妙經典，令如是等種種百千衰耗之事，悉皆滅盡。

G02 願護人

世尊！如諸國王所有土境，是持經者，若至其國。是王應當往是人所，聽受

如是微妙經典。聞已歡喜，復當護念恭敬是人。

世尊！我等四王復當勤心擁護是王及國人民，為除衰患，令得安隱。

世尊！若有比丘、比丘尼、優婆塞、優婆夷，受持是經。若諸人王，有能供給施其所安。我等四王，亦當令是王及國人民，一切安隱，具足無患。

世尊！若有四眾受持讀誦是妙經典。若諸人王，有能供養、恭敬、尊重、讚歎。我等四王，亦復當令如是人王，於諸王中，常得第一供養、恭敬、尊重、讚歎。亦令餘王，欽尚羨慕，稱讚其善。

E02 如來述

有二：①讚，②正述。

F01 讚

爾時，世尊讚歎護世四天王等：善哉，善哉！汝等四王，過去已曾供養、恭敬、尊重、讚歎無量百千萬億諸佛。於諸佛所，種諸善根，

言四王過去供養諸佛者，此四王位登初地，三阿僧祇劫行，行也。

種諸善根者，過世心也。

如《大集經》說：初地作四天王，二地作忉利王，三地作炎摩王，四地作兜率王，五地作化樂王，六地作他化王，七地初禪，八地二禪，九地三禪，十地四禪也。

十迴，金輪王王四天下。十行，銀輪王王三天下。十解，銅輪王王二天下。十信，鐵輪王王一天下也。

F02 正述

有二：①述成有德，②述成願護。

G01 述成有德

說於正法，修行正法，以法治世，為人天王。

汝等今日，長夜利益於諸眾生，行大慈心，施與眾生一切樂具，能遮諸惡，勤與諸善。

G02 述成願護

不述聞法得利。

有二：①護人，②護國。

H01 護人

以是義故，若有人王，能供養恭敬此《金光明》微妙經典，汝等正應如是護

念，滅其苦惱，與其安樂。

H02 護國

汝等四王及諸眷屬、無量無邊百千鬼神，若能護念如是經者，即是護持去來現在諸佛正法。

汝等四王及餘天眾百千鬼神，與阿修羅共戰鬥時，汝等諸天常得勝利。

汝等若能護念此經，悉能消伏一切諸苦，所謂怨賊、饑饉、疾疫。

若四部眾，有能受持讀誦此經，汝等亦應勤心守護，為除衰惱，施與安樂。

D02 勸他弘通

有三：①正勸他弘經，②示弘經方法，③明得失以結勸。

菩薩不但自行，復欲他化故，先勸他弘經。弘經必有方法故，次示方法。既

知方法，不行則失，行則為得，故次明得失。

E01 正勸他弘經

有二：①四王勸，②如來述。

F01 四王勸

有二：①勸國王弘經，②明四王擁護。

G01 勸國王弘經

爾時，四王復白佛言：世尊！是《金光明》微妙經典，於未來世在所流布，若國土、城邑、郡縣、村落，隨所至處。若諸國王，以天律治世，復能恭敬至心聽受是妙經典，并復尊重、供養、供給持是經典四部之眾。

G02 明四王擁護

有二：①四王聞法得利，②明人王被護。

H01 四王聞法得利

以是因緣，我等時時得聞如是微妙經典。聞已，即得增益身力，心進勇銳，具諸威德。

H02 明人王被護

有三：①明護法，②護人，③護國。

I01 明護法

是故，我等及無量鬼神，常當隱形，隨其妙典所流布處，而作擁護，令無留難。

I02 明護人

亦當護念聽是經典諸國王等及其人民，除其患難，悉令安隱。

I03 明護國

有三：①表，②釋，③結。

J01 表

他方怨賊，亦使退散。

J02 釋

若有人王，聽是經時，鄰國怨敵興如是念：「當具四兵壞彼國土」。

世尊！以是經典威神力故，爾時鄰敵更有異怨為作留難。於其境界，起諸衰惱、災異、疫病。爾時，怨敵起如是等諸惡事已，備具四兵，發向是國，規往

討罰。我等爾時，當與眷屬無量無邊百千鬼神，隱蔽其形，為作護助，令彼怨敵自然退散。

J03 結

起諸怖懾，種種留難。彼國兵眾尚不能到，況復當能有所破壞？

⑩經與四王，本是利他。云何乃令彼國有苦？

⑪經及四王，無心總彼。但此土弘經，則此土有德。彼王惡意，違此有德，為惡自就耳。如人惡心違佛及父母也。

F02 如來述

有二：①四王擁護，②國王弘經。

G01 四王擁護

有三：①述成護法，②述成護人，③述成護土。

H01 述成護法

爾時，佛讚四天王等：善哉！善哉！汝等四王乃能擁護我百千億那由他劫所可修習阿耨多羅三藐三菩提。

H02 述成護人

及諸人王受持是經恭敬供養者，為消衰患，令其安樂。

H03 述成護土

有三：①略述，②廣述，③結。

I01 略述

復能擁護宮殿、舍宅、城邑、村落、國土邊疆。乃至怨賊，悉令退散，滅其衰惱，令得安隱。亦令一切閻浮提內，所有諸王，無諸凶衰鬥訟之事。

I02 廣述

四王！當知此閻浮提八萬四千城邑聚落、八萬四千諸人王等，各於其國，娛樂快樂，各各於國而得自在。於自所有錢財珍寶，各各自足，不相侵奪。如其宿世所修集業，隨業受報。不生惡心，貪求他國。各各自生利益之心，生於慈心、安樂之心、不諍訟心、不破壞心、無繫縛心、無楚撻心。各於其土，自生愛樂，上下和穆猶如水乳，心相愛念，增諸善根。

I03 結

以是因緣故，此閻浮提，安隱豐樂，人民熾盛，大地沃壤，陰陽調和，時不越序，日月星宿不失常度，風雨隨時，無諸災橫，人民豐實，自足於財。心無貪吝，亦無嫉妬，等行十善。其人壽終，多生天上，天宮充滿，增益天眾。

G02 國王弘經

有四：①人王弘經，②天王得益，③勸，④勸天王護。

H01 人王弘經

若未來世，有諸人王，聽是經典，及供養恭敬受持是經四部之眾。

H02 天王得益

是王，則為安樂利益汝等四王及餘眷屬無量百千諸鬼神等。

何以故？汝等四王，若得時時間是經典，則為已得正法之水，服甘露味，增益身力，心進勇銳，具諸威德。

H03 勸

是諸人王，若能至心聽受是經，則為已能供養於我。若供養我，則是供養過去未來現在諸佛。若能供養過去未來現在諸佛，則得無量不可思議功德之聚。

H04 勸天王護

以是因緣，是諸人王，應得擁護。及后妃嫔女中宮眷屬諸王子等亦應得護。衰惱消滅，快樂熾盛。宮殿堂宇安隱清淨，無諸災變。護宅之神，增長威德，亦受無量歡悅快樂。

是諸國土，所有人民，悉受種種五欲之樂，一切惡事悉皆消滅。

E02 示弘經方法

有二：①示弘經方法，②示用心方法。

F01 示弘經方法

有二：①四王勸，②如來述。

G01 四王勸

有二：①舉果報，②明修因。

H01 舉果報

爾時，四天王白佛言：世尊！未來之世，若有人王，欲得護身，及后妃嫔女諸王子等宮殿屋宅，得第一護身所王領，最為殊勝，具不可思議王者功德。欲得攝取無量福聚，國土無有他方怨賊，無諸憂惱及諸苦事。

H02 明修因

有二：①明重法，②明敬人。

I01 明重法

世尊！如是人王，不應放逸，散亂其心。應生恭敬、謙下之心。應當莊嚴第一微妙最勝宮宅。種種香汁，持用灑地。散種種花，敷大法座，獅子之座。兼以無量珍琦異物，而為校飾，張施種種無數微妙幢幡寶蓋。當淨洗浴，以香塗身，著好淨衣，纓絡自嚴。坐卑小座，不自高大。除去自在，離諸放逸。謙下自卑，除去驕慢。正念聽受如是妙典。

I02 明敬人

於說法者，生世尊想。復於宮內后妃、王子、嫔女眷屬，生慈哀心。和顏與

語，勸以種種供養之具供養法師。

是王，爾時，既勸化已，即生無量歡喜快樂，心懷悅豫，倍復自勵，不生疲倦，多作利益。於說法者，倍生恭敬。

G02 如來述

但述行因，不述得果。

有二：①述敬人，②述重法。

H01 述敬人

爾時，佛告四天大王：爾時人王應著白淨鮮潔之衣，種種纓絡，齊整莊嚴，執持素白微妙上蓋，服飾容儀，不失常則，躬出奉迎說法之人。

何以故？是王，如是隨其舉足，步步之中，即是供養值遇百千億那由他諸佛

世尊。復得超越如是等劫生死之難。復於來世爾所劫中，常得封受轉輪王位。隨其步步，亦得如是現世功德，不可思議自在之力。常得最勝極妙七寶人天宮殿。在在生處，增益壽命。言語辯了，人所信用。無所畏忌，有大名稱。常為人天之所恭敬，天上人中受上妙樂。得大勢力，具足威德。身色微妙，端嚴第一。常值諸佛，遇善知識。成就具足無量福聚。

汝等四天王！如是人王，見如是等種種無量功德利益。是故，此王應當躬出奉迎法師；若一由旬，至百千由旬。

H02 述重法

於說法師，應生佛想。

應作是念：「今日，釋迦如來正智，入於我宮，受我供養，為我說法。我聞

是法，即不退轉於阿耨多羅三藐三菩提，已為得值百千萬億那由他佛，已為供養過去未來現在諸佛，已得畢竟三惡道苦。我今已種百千無量轉輪聖王釋梵之因，已種無邊善根種子，已令無量百千萬億諸眾生等度於生死，已集無量無邊福聚，後宮眷屬已得擁護，宮宅諸衰悉已消滅，國土無有怨賊棘刺，他方怨敵不能侵陵。」

汝等四王！如是人王，應作如是供養正法，清淨聽受是妙經典，及恭敬、供養、尊重、讚歎持是經典四部之眾。亦當迴此所得最勝功德之分，施與汝等及餘眷屬諸天鬼神。聚集如是諸善功德，現世常得無量無邊不可思議自在之利，威德勢力成就具足，能以正法摧伏諸惡。

F02 示用心方法

有二：①四王勸，②如來述。

G01 四王勸

有二：①示聽法運心，②示供養運心。

④問四王是初地已上，云何乃就人王述善？

④釋此是應迹，令物傾仰，生於勝福耳。

H01 示聽法運心

爾時，四王白佛言：世尊！若未來世，有諸人王，作如是等恭敬正法，至心聽受是妙經典，及恭敬、供養、尊重、讚歎持是經典四部之眾，嚴治舍宅，香汁灑地，專心正念。聽說法時，我等四王亦當在中，共聽此法。願諸人王，為自利故，以己所得功德，少分施與我等。

H02 示供養運心

世尊！是諸人王，於說法者所坐之處。為我等故，燒種種香，供養是經。是妙香氣，於一念頃，即至我等諸天宮殿，其香即時變成香蓋，其香微妙，金色晃耀，照我等宮、釋宮、梵宮。大辯天神、功德天神、堅牢地神、散脂鬼神、最大將軍、二十八部鬼神大將、摩醯首羅、金剛密迹、摩尼跋陀鬼神大將、鬼子母與五百兒子周匝圍繞、阿耨達龍王、娑竭羅龍王。如是等眾，自於宮殿，各各得聞是妙香氣，及見香蓋光明普照。是香蓋光明，亦照一切諸天宮殿。

G02 如來述

但述供養運心，不述聽法運心。

有二：①此土釋迦述人王供，②明他方諸佛讚四眾弘經耳。

H01 此土釋迦述人王供

有二：①明非唯照天宮，亦遠至大千。②明非但至大千，亦遍至十方佛土。

I01 明非唯照天宮 亦遠至大千

佛告四王：是香蓋光明，非但至汝四王宮殿。

何以故？是諸人王，手擎香爐，供養經時，其香遍布。於一念頃，遍至三千大千世界，百億日月、百億大海、百億須彌山、百億大鐵圍山、小鐵圍山及諸山王；百億四天下、百億四天王、百億三十三天，乃至百億非想非非想天。於此三千大千世界、百億三十三天，一切龍、鬼、乾闥婆、阿修羅、迦樓羅、緊那羅、摩睺羅伽宮殿虛空，悉滿種種香煙雲蓋，其蓋金光亦照宮殿。如是三千大千世界，所有種種香煙雲蓋，皆是此經威神力故。

I02 明非但至大千 亦遍至十方佛土

是諸人王，手擎香爐，供養經時。種種香氣，不但遍此三千大千世界。於一念頃，亦遍十方無量無邊恆河沙等百千萬億諸佛世界，於諸佛上，虛空之中，亦成香蓋。金光普照，亦復如是。

H02 明他方諸佛讚四眾弘經

有二：①明聞見興神變，②讚歎。

I01 明聞見興神變

諸佛世尊聞是妙香，見是香蓋及金色光。於十方界恆河沙等諸佛世界，作如是等神力變化已。

I02 讚歎

有二：①讚四眾弘經，②讚四眾得果。

J01 讚四眾弘經

異口同音，於說法者，稱讚：「善哉，善哉！大士！汝能廣宣流布如是甚深微妙經典，則為成就無量無邊不可思議功德之聚。若有聞是甚深經典，所得功德，則為不少，況受持、讀誦、為他眾生開示分別演說其義！」

何以故？善男子！此《金光明》微妙經典，無量無邊億那由他諸菩薩等，若得聞者，即不退於阿耨多羅三藐三菩提。

J02 讚四眾得果

有二：①讚當得，②歎已得。

K01 讚當得

爾時，十方無量無邊恆河沙等諸佛世界現在諸佛，異口同聲作如是言：「善男子！汝於來世，必定當得坐於道場菩提樹下。於三界中，最尊最勝，出過一切眾生之上。勤修力故，受諸苦行，善能莊嚴菩提道場，能壞三千大千世界外道邪論，摧伏諸魔怨賊異形，覺了諸法第一寂滅清淨無垢甚深無上菩提之道。

K02 歎已得

善男子！汝已能坐金剛座處，轉於無上諸佛所讚十二種行甚深法輪，能擊無上最大法鼓，能吹無上極妙法螺，能豎無上最勝法幢，能然無上極明法炬，能雨無上甘露法雨，能斷無量煩惱怨結，能令無量百千萬億那由他眾度於無涯可畏大海，解脫生死無際輪轉，值遇無量百千萬億那由他佛。」

因中說果，故名已得。

十二種行者，謂小乘法也。無上法鼓等者，謂大乘法也。

E03 明得失以結勸

有二：①四王結勸，②如來述。

F01 四王結勸

有二：①人王弘經，天聽受。②正結勸。

G01 人王弘經 天聽受

爾時，四天王復白佛言：世尊！是《金光明》微妙經典，能得未來現在種種無量功德。是故，人王若得聞是微妙經典，則為已於百千萬億無量佛所種諸善根。

我以敬念是人王故，復見無量福德利故，我等四王及餘眷屬無量百千萬億鬼

神，於白宮殿見是種種香煙雲蓋瑞應之時，我當隱蔽，不現其身，為聽法故，當至是王所止宮殿講法之處。大梵天王、釋提桓因、大辯天神、功德天神、堅牢地神、散脂鬼神、大將軍等二十八部鬼神大將、摩醯首羅、金剛密迹、摩尼跋陀鬼神大將、鬼子母及五百兒子周匝圍繞；阿耨達龍王、娑竭羅龍王，無量百千萬億那由他鬼神諸天，如是等眾，為聽法故，悉自隱蔽，不現其身，至是人王所止宮殿講法之處。

世尊！我等四王及餘眷屬無量鬼神，悉當同心，以是人王為善知識。同共一行，善相應行。能為無上大法施主，以甘露味充足我等。我等應當擁護是王，除其衰患，令得安隱，及其宮宅、國土、城邑，諸惡災患，悉令消滅。

同共一行者，言是弘經人王與四天王同行大乘，故名一行。

無有相違，名相應行。又，是人王弘經，利益四天，故名施主。

G02 正結勸

有三：①明不弘經者，則有國敗之失。②明弘經者，則有土豐之得。③正結勸修行。

H01 明不弘經者，則有國敗之失

有四：①明不弘經，②明四王失利，③明諸天捨國，④明國敗亡。

I01 明不弘經

世尊！若有人王，於此經典，心生捨離，不樂聽聞。其心不欲恭敬、供養、尊重、讚歎。若四部眾有受持讀誦講說之者，亦復不能恭敬、供養、尊重、讚歎。

I02 明四王失利

我等四王及餘眷屬無量鬼神，即便不得聞此正法，背甘露味，失大法利，無有勢力及以威德，減損天眾，增長惡趣。

I03 明諸天捨國

世尊！我等四王及無量鬼神，捨其國土。不但我等，亦有無量守護國土諸舊善神，皆悉捨去。

I04 明國敗亡

我等諸王及諸鬼神，既捨離已，其國當有種種災異，一切人民失其善心，唯有繫縛、瞋恚、鬥諍，互相破壞，多諸疾疫，彗星現怪，流星崩落，五星諸宿違失常度，兩日並現，日月薄蝕，白黑惡虹數數出現，大地震動，發大音聲，

暴風惡雨無日不有，穀米勇貴，饑饉凍餓，多有他方怨賊侵掠其國，人民多受苦惱，其地無有可愛樂處。

世尊！我等四王及諸無量百千鬼神，并守國土諸舊善神，遠離去時，生如是等無量惡事。

H02 明弘經者，則有土豐之得

有四：①明人王欲得土安，②明勸人王弘經，③明四王得益，④明國安隱。

I01 明人王欲得土安

世尊！若有人王，欲得自護，及王國土多受安樂，欲令國土一切眾生悉皆成就具足快樂，欲得摧伏一切外敵，欲得擁護一切國土，欲以正法正治國土，欲得除滅眾生怖畏。

I02 明勸人王弘經

世尊！是人王等，應當必定聽是經典，及恭敬、供養、讀誦受持是經典者。

I03 明四王得益

我等四王及無量鬼神，以是法食善根因緣，得服甘露無上法味，增長身力，心進勇銳，增益諸天。

I04 明國安隱

有三：①明此經用，勝彼三論。②明說此經人，勝彼說論之人。③明此經理，過彼三論之理。

J01 明此經用 勝彼三論

何以故？以是人王，至心聽受是經典故，如諸梵天說出欲論、釋提桓因種種

善論、五通之人神仙之論。

世尊！梵天、釋提桓因、五神通人，雖有百千億那由他無量勝論，是《金光明》，於中最勝。

所以者何？如來說是《金光明經》，為眾生故。為令一切閻浮提內，諸人王等，以正法治。為與一切眾生安樂，為欲愛護一切眾生，欲令眾生無諸苦惱，無有他方怨賊棘刺。所有諸惡，背而不向。欲令國土，無有憂惱。以正法教，無有諍訟。

是故，人王，各於國土，應然法炬，熾然正法，增益天眾。

我等四王及無量鬼神、閻浮提內諸天善神，以是因緣，得服甘露法味充足，得大威德，進力具足。閻浮提內安隱豐樂，人民熾盛，安樂其處。復於來世，

無量百千不可思議那由他劫，常受微妙第一快樂。復得值遇無量諸佛，種諸善根，然後證成阿耨多羅三藐三菩提。

言出欲論者，是四違陀經，明梵天離欲等事。

言帝釋善論者，謂伽羅論，明十善等事。

言神仙論者，謂伽世師彌論，明五通仙藥等事。

何故此法勝他三論者，此經以如來大悲，廣為利益一切眾生，與樂拔苦，故勝彼論也。大悲力過梵天，苦行力過帝釋者，此是互舉一邊。

J02 明說此經人，勝彼說論之人

得如是等無量功德，悉是如來正遍知說。如來過於百千億那由他諸梵天等，以大悲力故。亦過無量百千億那由他釋提桓因，以苦行力故。

是故，如來為諸眾生，演說如是《金光明經》。

J03 明此經理，過彼三論之理

若閻浮提一切眾生及諸人王，世間出世間所作國事，所造世論，皆因此經。

欲令眾生得安樂故，釋迦如來示現是經，廣宣流布。

H03 正結勸修行

世尊！以是因緣故，是諸人王，應當必定聽受、供養恭敬、尊重讚歎是經。

F02 如來述

有二：①述護人王，②述護眾。

G01 述護人王

爾時。佛復告四天王：汝等四王及餘眷屬無量百千那由他鬼神！是諸人王，

若能至心聽是經典，供養、恭敬、尊重、讚歎。汝等四王！正應擁護，滅其衰患，而與安樂。

G02 述護眾

若有人能廣宣流布如是妙典，於人天中，大作佛事，能大利益無量眾生，如是之人，汝等四王，必當擁護。莫令他緣，而得擾亂。令心恬靜，受於快樂，續復當得廣宣是經。

A02 明四王歎佛，如來歎經

能說經故，四王歎佛。經能成人，故佛歎經。

有二：①四王讚佛，②如來歎經。

B01 四王讚佛

有三：①標，②讚，③結。

C01 標

爾時，四天王即從座起，偏袒右肩，右膝著地，長跪合掌。於世尊前，以偈讚曰：

C02 讚

有二：①讚應化二身，②歎法身。

D01 讚應化二身

有二：①略，②廣。

E01 略

有二：①歎化身色光明，②歎身功德智慧三昧也。

F01 歎化身色光明

佛月清淨 滿足莊嚴 佛日暉曜 放千光明

如來面目 最上明淨

F02 歎身功德智慧三昧

齒白無垢 如蓮花根 功德無量 猶如大海

智淵無邊 法水具足

E02 廣

有二：①廣化身，②廣應身。

F01 廣化身

百千三昧 無有缺減 足下平滿 千輻相現

F02 廣應身

足指網縵 猶如鵝王

D02 歎法身

於中：①歎法身中體，②歎法身用。

E01 歎法身中體

光明晃耀 如寶山王

E02 歎法身用

微妙清淨 如鍊真金 所有福德 不可思議

C03 結

佛功德山 我今敬禮 佛真法身 猶如虛空

應物現形 如水中月 無有障礙 如焰如化

是故我今 稽首佛月

B02 如來歎經

爾時，世尊以偈答曰：

有四：①歎經力大，②勸人王弘，③令天王護，④結上三義。

C01 歎經力大

有二：①歎體，②歎用。

D01 歎體

有二：①明法，②明人。

E01 明法

此金光明 諸經之王 甚深最勝 為無有上

E02 明人

十力世尊 之所宣說 汝等四王 應當勤護

D02 歎用

有三：①與樂，②生善，③拔苦。

E01 與樂

以是因緣 是深妙典 能與眾生 無量快樂

E02 生善

為諸眾生 安樂利益 故久流布 於閻浮提

E03 拔苦

能滅三千 大千世界 所有惡趣 無量諸苦

C02 勸人王弘

有二：①勸弘通，②明得益。

D01 勸弘通

有二：①明弘者有利，②正勸。

E01 明弘者有利

閻浮提內 諸人王等 心生慈愍 正法治世

若能流布 此妙經典 則令其土 安隱豐熟

所有眾生 悉受快樂

E02 正勸

若有人王 欲愛己身 及其國土 欲令豐盛
應當至心 淨潔洗浴 往法會所 聽受是經

D02 明得益

有二：①法說，②譬說。

E01 法說

有三：①明生道善，②拔生死苦，③與因安樂。

F01 明生道善

是經能作 所有善事

F02 拔生死苦

摧伏一切 內外怨賊 復能除滅 無量怖畏

F03 與因安樂

是諸經王 能與一切 無量眾生 安隱快樂

E02 譬說

有三：①寶樹，②冷水，③珍寶。

F01 寶樹

譬如寶樹 在人家中 悉能出生 一切珍寶

是妙經典 亦復如是 悉能出生 諸王功德

F02 冷水

如清冷水 能除渴乏 是妙經典 亦復如是

能除諸王 功德渴乏

F03 珍寶

譬如珍寶 異物篋器 悉在于手 隨意所用

是金光明 亦復如是 隨意能與 諸王法寶

C03 令天王護

有四：①諸天供養，②四王護持。此二正護法。

③諸佛護念，④鬼神擁護。此二正護人。

D01 諸天供養

是金光明 微妙經典 常為諸天 恭敬供養

D02 四王護持

亦為護世 四大天王 威神勢力 之所護持

D03 諸佛護念

十方諸佛 常念是經 若有演說 稱讚善哉

D04 鬼神擁護

亦有百千 無量鬼神 從十方來 擁護是人

C04 結上三義

有三：①歎經力大，②人王聽受，③天王守護。

D01 歎經力大

若有得聞 是妙經典 心生歡喜 踊躍無量

D02 人王聽受

閻浮提內 無量大眾 皆悉歡喜 集聽是經

D03 天王守護

聽是經故 具諸威德 增益天眾 精氣身力

A03 明四王歡喜，供養發願

以聞經力大，生歡喜心。供養佛，發願故。

B01 聞經歡樂

爾時，四天王聞是偈已，白佛言：世尊！我從昔來，未曾得聞如是微妙寂滅之法。我聞是已，心生悲喜，涕淚交流，舉身戰動，肢節怡解，復得無量不可思議具足妙樂。

言寂滅法者，領上法身體也。

B02 散花供養

以天曼陀羅花、摩訶曼陀羅花，供養奉散於如來上。

B03 願護弘經人

作如是等供養佛已，復白佛言：世尊！我等四王，各各自有五百鬼神，常當隨逐是說法者，而為守護。

⑦ 大辯天品

明八部利益弘通之人，即為四別。

大辯品與功德品，益資財。地神品，施飲食。散脂品，益智慧。

若無辯才資生衣服飲食智慧，不能弘法。是故四神次第益之。

此大辯神，迹在天上神。本是九地菩薩，具足四辯，故名大辯品。

有二：①利益說人，②利益聽眾。

A01 利益說人

有二：①明利益說者，②勸為他說。

B01 明利益說者

有二：①益四辯，②益總持力。

C01 益四辯

爾時，大辯天白佛言：世尊！是說法者，我當益其樂說辯才。

是樂說辯。

令其所說，莊嚴次第，

是辭辯。

善得大智。

合明法義二辯。

C02 益總持力

若是經中，有失文字句義違錯，我能令是說法比丘，次第還得，能與總持，令不忘失。

B02 勸為他說

有二：①所化人有善根，②勸為他說。

C01 所化人有善根

若有眾生，於百千佛所，種諸善根，

C02 勸為他說

是說法者，為是等故，於閻浮提廣宣流布是妙經典，令不斷絕。復令無量無

邊眾生得聞是經。

A02 利益聽眾

有三：①益福慧，②與四辯，③明得佛果也。

B01 益福慧

當令是等悉得猛利不可思議大智慧聚、不可稱量福德之報。

先與智慧，後益福報。

B02 與四辯

善解無量種種方便、善能辯暢一切諸論、善知世間種種技術。

善解方便，即辭辯也。善能辯暢諸論者，是樂說辯。善知伎術者，謂法義二辯。

B03 得佛果

能出生死，得不退轉，必定疾得阿耨多羅三藐三菩提。

⑧ 功德天品

此神迹在樹神之王，隨所至處與他勝樂，故名功德。

外國呼神，亦名為天。此神本是初地，初地具足檀波羅蜜，故有財物自在行也。

此品中亦與食飲，而與財物為正。

有二：①與說者所須，②與聽眾財物。

A01 與說者所須

有二：①正與所須乃至令得尋經，②勸令弘經。

B01 正與所須乃至令得尋經

爾時，功德天白佛言：世尊！是說法者，我當隨其所須之物，衣服、飲食、臥具、醫藥，及餘資產，供給是人，無所乏少。令心安住，晝夜歡樂，正念思惟是經章句，分別深義。

B02 勸令弘經

有三：①明所化者善根，②正勸令弘，③明所化利益。

C01 明所化者善根

若有眾生，於百千佛所種諸善根。

C02 正勸令弘

是說法者，為是等故，於閻浮提廣宣流布是妙經典，令不斷絕，

C03 明所化利益

是諸眾生，聽是經已，於未來世無量百千那由他劫，常在天上人中受樂，值遇諸佛，速成阿耨多羅三藐三菩提。三惡道苦，悉畢無餘。

A02 與聽眾財物

有二：①明有與之德，②明與所須。

B01 明有與之德

有二：①明宿殖善根，②明今身得隨意報。

C01 明宿殖善根

世尊！我已於過去寶花功德海琉璃金山照明如來，應供，正遍知，明行足，善逝，世間解，無上士，調御丈夫，天人師，佛世尊所，種諸善根。

C02 明今身得隨意報

是故，我今隨所念方、隨所視方、隨所至方，能令無量百千眾生受諸快樂，若衣服、飲食，資生之具、金銀七寶、真珠、琉璃、珊瑚、琥珀、璧玉珂貝，悉無所乏。

故能以慈心隨所念方，以天眼隨所視方，以身通隨所至方，令眾生受樂七寶具足也。

B02 明與所須

有三：①略明，②廣說，③結勸。

C01 略明

有二：①明令其修因，②明得果。

D01 明令其修因

若有人，能稱《金光明》微妙經典，為我供養諸佛世尊，三稱我名，燒香供養。供養佛已，別以香花種種美味，供施於我，灑散諸方。

修因者，所謂稱《金光明》，為功德天供養諸佛，別以香花供養天神也。

D02 明得果

當知是人，即能聚集資財寶物。以是因緣，增長地味，地神諸天悉皆歡喜，所種穀、米、芽、莖、枝葉、果實滋茂，樹神歡喜，出生無量種種諸物。我時慈念諸眾生故，多與資生所須之物。

得果者，所謂財寶地味穀果滋茂出生諸物也。

C02 廣說

有二：①勸修因，②明得果。

D01 勸修因

有三：①示處所，②勸修因，③明天來。

E01 示處所

世尊！於此北方毘沙門天王有城，名曰阿尼曼陀，其城有園，名功德花光。
於是園中，有最勝園，名曰金幢七寶極妙，此即是我常止住處。

E02 勸修因

有四：①修治內外，②明供養三寶，③明讀誦呪，④明修行發願。

F01 修治內外

若有欲得財寶增長。是人當於自所住處，應淨掃灑，洗浴其身，著鮮白衣，

妙香塗身。

住處淨掃是外，著衣塗身是內。

F02 明供養三寶

為我至心，三稱彼佛寶花琉璃世尊名號，禮拜、供養，燒香、散花。亦當三稱《金光明經》，至誠發願。別以香花種種美味，供施於我，散灑諸方。

F03 明讀誦呪

爾時，當說如是章句：

波利富樓那遮利 三曼陀達舍尼羅佉 摩訶毘呵羅伽帝 三曼陀毘陀尼那伽
帝 摩訶迦梨波帝 波婆禰薩婆哆吒 三曼陀修鉢梨富隸 阿夜那達摩帝 摩
訶毘鼓畢帝 摩訶彌勒簸僧祇帝 醯帝筵三博祇憇帝 三曼陀阿咤 阿菟婆羅

尼

是灌頂章句，必定吉祥，真實不虛。等行眾生，及中善根，應當受持讀誦通利。

言灌頂章句者，所謂神呪。神呪所詮，凡有四種：①歎諸佛功德。②說第一義諦。③明藥草。④唱鬼神名字。

此中所明，應是諸佛功德。明諸佛功德，灌眾生信心之頂，登法王位。

從譬為名，故言灌頂。依此呪力，必得善果，故言吉祥不虛。

等行眾生者，欲行此法，必須同行之人。及中善根者，言下根心薄，誦不得呪力。上根德厚，不依呪力。必須中根也。

F04 明修行發願

七日七夜受持八戒，朝暮淨心，香花供養十方諸佛，常為己身及諸眾生，迴向具足阿耨多羅三藐三菩提。

E03 明天來

有三：①令興念，②明淨舍宅以待，③明天神來。

F01 令興念

作是誓願：「令我所求，皆得吉祥。」

F02 明淨舍宅以待

自於所居房舍屋宅，淨潔掃除。若自住處、若阿蘭若處，以香泥塗地、燒微妙香、敷淨好座。以種種花香布散其地，以待於我。

F03 明天神來

我於爾時，如一念頃，入其室宅，即坐其座。

D02 明得果

有二：①明所須無乞，②明始終扶護。

E01 明所須無乞

從此日夜，令此所居，若村邑、若僧坊、若露地，無所乏少。若錢若金銀若珍寶、若牛羊、若穀米，一切所須，即得具足，悉受快樂。

此是與樂也。

E02 明始終扶護

若能以己所作善根最勝之分迴與我者。我當終身，不遠其人。於所住處，至心護念。隨其所求，令得成就。

此除苦也。

C03 結勸

應當至心禮如是等諸佛世尊，其名曰：寶勝如來、無垢熾寶光明王相如來、金焰光明如來、金百光明照藏如來、金山寶蓋如來、金花焰光相如來、大炬如來、寶相如來。

亦應敬禮：信相菩薩、金光明菩薩、金藏菩薩、常悲菩薩、法上菩薩。

亦應敬禮：東方阿閼如來、南方寶相如來、西方無量壽佛、北方微妙聲佛。

⑨ 堅牢地神品

施飲食利益行人。

神能持地，使令不壞，因功受稱。此神亦是迹在地神。本是初地以上，故有

施飲食自在行也。

有三：①明地神供養弘經之人，②明由供養故得弘經，③明由弘故得勝果。

A01 明地神供養弘經之人

有三：①表示處，②明供養，③明聞法得益。

B01 表示處

爾時，地神堅牢白佛言：世尊！是《金光明》微妙經典，若現在世、若未來世，在在處處，若城邑聚落，若山澤空處，若王宮宅。

B02 明供養

世尊！隨是經典所流布處，是地分中，敷獅子座，令說法者坐其座上，廣演宣說是妙經典。我當在中，常作宿衛，隱蔽其身，於法座下，頂戴其足。

B03 明聞法得益

有二：①明地神獲利，②明眾生得益。

C01 明地神獲利

我聞法已，得服甘露無上法味，增益身力，

C02 明眾生得益

有三：①明財利，②明法利益，③結。

D01 明財利

而此大地深十六萬八千由旬，從金剛際至海地上，悉得眾味增長具足，豐壤肥濃過於今日。

以是之故，閻浮提內藥草樹木、根莖枝葉花果滋茂，美色香味，皆悉具足。

眾生食已，增長壽命色力辯安，六情諸根具足通利，威德顏貌，端嚴殊特。

明誦出地肥，增長百味，資益身力，顏貌妙特。

D02 明法利益

成就如是種種等已。所作事業，多得成辦。有大勢力，精勤勇猛。

D03 結

是故，世尊！閻浮提內安隱豐樂，人民熾盛。一切眾生，多受快樂，應心適意，隨其所樂。

結財利。

是諸眾生。得是威德大勢力已，能供養是《金光明經》，及恭敬供養持是經者四部之眾。

結法利。

A02 明由供養故得弘經

有三：①明地神請說此經，②明說經利物，③勸人聽受。

B01 明地神請說此經

我於爾時，當往其所，為諸眾生受快樂故，請說法者廣令宣布如是妙典。

B02 明說經利物

何以故？世尊！是《金光明》，若廣說時，我及眷屬所得功德，倍過於常，增長身力，心進勇銳。

世尊！我服甘露無上味已，閻浮提地縱廣七千由旬，豐壤倍常。

世尊！如是，大地眾生所依，悉能增長一切所須之物。增長一切所須物已，

令諸眾生隨意所用，受於快樂。種種飲食、衣服、臥具、宮殿、屋宅、樹木、林苑、河池、井泉，如是等物，依因於地，悉皆具足。

B03 勸人聽受

有三：①明教念，②明勸聽受，③明白慶有五事。

C01 明教念

是故，世尊！是諸眾生，為知我恩，應作是念：「我當必定聽受是經，供養恭敬尊重讚歎。」

C02 明勸聽受

作是念已，即從住處，若城邑、聚落、舍宅、空地，往法會所，聽受是經。

C03 明白慶

既聽受已，還其所止，各應相慶，作如是言：

「我等今者，聞此甚深無上妙法。

慶聞法。

已為攝取不可思議功德之聚。

慶攝功德。

值遇無量無邊諸佛。

慶值諸佛。

三惡道報，已得解脫。

慶免惡趣。

於未來世，常生天上人中受樂。」

慶生人天

A03 明由弘故得勝果

有三：①地神明得果，②如來報述，③地神奉酬。

B01 地神明得果

有二：①明弘經，②明得果。

C01 明弘經

是諸眾生，各於住處，若為他人演說是經，若說一喻一品一緣，若復稱歎一佛一菩薩一四句偈乃至一句，及稱是經首題名字。

一喻者，經中有明一譬喻也。一緣者，經中所說一因願事二緣事。

C02 明得果

世尊！隨是眾生所住之處，其地具足豐壤肥濃，過於餘地。凡是因地所生之物，悉得增長，滋茂廣大。令諸眾生受於快樂，多饒財寶，好行惠施，心常堅固，深信三寶。

地豐物茂，眾生受樂，明報果。多饒財貨，好行惠施，明習果也。

B02 如來報述

有二：①明聽者得報，②明供養者得報。

C01 明聽者得報

爾時，佛告地神堅牢：若有眾生，乃至聞是《金光明經》一句之義，人中命終，隨意往生三十三天。

C02 明供養者得報

地神！若有眾生，為欲供養是經典故，莊嚴屋宅，乃至張懸一幡一蓋，及以一衣，欲界六天已有自然七寶宮殿。是人命終，即往生彼。地神！於諸七寶宮殿之中，各各自然有七天女共相娛樂，日夜常受不可思議微妙快樂。

B03 地神奉酬

有三：①明地神供養說者，②明眾生聽聞，③明眾生得果。

C01 明地神供養說者

爾時，地神白佛言：世尊！以是因緣，說法比丘坐法座時，我常晝夜，衛護不離，隱蔽其形，在法座下，頂戴其足。

C02 明眾生聽聞

世尊！若有眾生，於百千佛所，種諸善根。是說法者，為是等故，於閻浮提

廣宣流布是妙經典，令不斷絕。

C03 明眾生得果

有二：①明受樂報，②明得果。

D01 明受樂報

是諸眾生，聽是經已，未來之世無量百千那由他劫，於天上人中常受快樂。

D02 明得果

值遇諸佛，疾成阿耨多羅三藐三菩提。三惡道苦，悉斷無餘。

⑩ 散脂鬼神品

明與智慧。

外國言散脂修摩，此云密神，迹在鬼王。本是十地，故能以智慧氣力利益弘

經者也。

有三：①明能益弘經之人，②明說者得益故能弘經，③歸依眾聖。

A01 明能益弘經之人

有二：①明神力擁護滅惡，②明以智慧氣力增益說者。

B01 明神力擁護滅惡

有三：①明能護之人，②明所護之法，③明守護之事。

C01 明能護之人

爾時，散脂鬼神大將，及二十八部諸鬼神等，即從座起，偏袒右肩，右膝著地。

C02 明所護之法

白佛言：世尊！是《金光明》微妙經典，若現在世，及未來世，在在處處，若城邑聚落、若山澤空處、若王宮宅，隨是經典所流布處。

C03 明守護之事

有三：①護說者，②護聽眾，③守國土。

D01 護說者

我當與此二十八部大鬼神等，往至彼所，隱蔽其形，隨逐擁護是說法者，消滅諸惡，令得安隱。

D02 護聽眾

及聽法眾，若男若女、童男童女，於是經中乃至得聞一如來名、一菩薩名，及此經典首題名字，受持讀誦，我當隨侍宿衛擁護，悉滅其惡，令得安隱。

D03 守國土

及國邑城郭，若王宮殿、舍宅空處，皆亦如是。

B02 明以智慧氣力增益說者

有二：①明能益之德，②明益物。

C01 明能益之德

有三：①表，②釋，③結。

D01 表

世尊！何因緣故我名散脂鬼神大將？唯然，世尊！自當證知。

D02 釋

有三：①明能知二諦之德，②明有能知二智之德，③雙結上二也。

E01 明能知二諦之德

世尊！我知一切法、一切緣法。了一切法，知法分齊。如法安住，一切法如性。於一切法，含受一切法。

言其二諦，各有事理：

妄法差別是俗諦事，緣集虛假是俗諦理。

真法恆沙是真諦事，恆沙即如是真諦理也。

我知二字，通貫下二句也。

我知一切法者，謂知俗諦事。

我知一切緣法者，謂知俗諦理也。

了一切法，知法分齊者，此是重顯知法分齊，故言了一切法，顯初句也。

知世諦法以虛假，為分齊故，言法分齊，顯後句也。

一切法如性者，謂真諦理。理無有二，故名為如。不改曰性，亦是性者，體也。

於一切法含受一切法者，謂真諦事。

於一一德中攝一切德，故言含受。

如法安住四字，通貫下二句：如理而證，如事而知。

無有功用動心，故言如法安住。

E02 明有能知二智之德

世尊！我現見：不可思議智光、不可思議智炬、不可思議智行、不可思議智聚、不可思議智境。

於中：四句明知智體，一句明知智用。

言智光者，明實智。當法而照，無有闇礙，如日光也。

言智炬者，明方便智。隨緣照，如炬明也。

言智行者，明下二智，不行為行也。

智聚者，言上二智，眾德積聚，故名為聚。

言智境者，依上二智所變化境，如化身故名為境。

故《大經》云：諸佛境界，悉皆無常也。

此智體智用，並是無名無相。

無相故不可思，無名故不可議，故言不可思議。

鬼王證知非是妄心境相，故言現見也。

E03 結

世尊！我於諸法，正解正觀，得正分別，正解於緣，正能覺了。

正解者，知世諦事非邪，故曰正解。非是比量，故曰正觀。非總相知，故言正分別。此結上知世諦事也。正解於緣者，結上知俗諦理也。正能覺了者，此總結知真諦事理，及智體智用境也。

D03 結

世尊！以是義故，名散脂大將。

C02 明益物

有二：①明益事，②出益相。

D01 明益事

世尊！我散脂大將，令說法者，莊嚴言辭，辯不斷絕，眾味精氣從毛孔入，充益身力，心進勇銳，成就不可思議智慧，入正憶念。如是等事，悉令具足。

所謂辯才、身力、勇銳、智慧、憶念等五事具足。

D02 出益相

心無疲厭，身受諸樂，心得歡喜。

所謂無疲、受樂、歡喜等三事也。

A02 明說者得益故能弘經

有四：①明說者有智能說，②明聽者有善堪受，③明勸為物說成上第一，④明聽者得利。

B01 明說者有智能說

以是意故，能為眾生廣說是經。

B02 明聽者有善堪受

若有眾生，於百千佛所，種諸善根。

B03 明勸為物說成上第一

說法之人，為是眾生，於閻浮提內，廣宣流布是妙經典，令不斷絕。

B04 明聽者得利

無量眾生，聞是經已，當得不可思議智聚，攝取不可思議功德之聚。於未來世無量百千劫，人天之中，常受快樂。於未來世，值遇諸佛，疾得證成阿耨多羅三藐三菩提。一切眾苦、三惡趣分，永滅無餘。

所謂智慧、功德、受樂、菩提、離苦，五種利也。

A03 歸依眾聖

南無寶花功德海琉璃金山光照，如來．應供．正遍知。

南無無量百千億那由他莊嚴其身釋迦，如來．應供．正遍知，熾然如是微妙法炬。

南無第一威德成就眾事大功德天。

南無不可思量智慧功德成就大辯天。

歸依眾聖力故，有上兩能故也。

⑪ 正論品

有二：①明緣起，②明正論緣起。

A01 明緣起

言正論者，四王與梵天問答明治化正法，故名正論品。

⑩治國正法，是世間論，云何名為弘宣此經得因益耶？

⑪治化之德，即是般若、大悲、平等之心。自非依經修行，何由能得不擇怨親平等治化也。

A02 明正論緣起

有二：①表起，②正是論說。

B01 表起

爾時，佛告地神堅牢：過去有王，名力尊相。其王有子，名曰信相，不久當受灌頂之位統領國土。

爾時，父王告其太子信相：「世有正論，善治國土。我於昔時曾為太子，不

久亦當紹父王位。爾時，父王持是正論，亦為我說。我以是論，於二萬歲善治國土，未曾一念以非法行。於自眷屬，情無愛著。」

何等名為治世正論？地神！爾時，力尊相王為信相太子，說是偈言：

B02 正是論說

有三：①誠許，②請問，③釋。

C01 誠許

我今當說 諸王正論 為利眾生 斷諸疑惑

一切人王 諸天天王 應當歡喜 合掌諦聽

誠許者，父王信相太子許說，正論也。

C02 請問

有二：①明四王讚請，②出四王請事。

D01 明四王讚請

諸王和合 集金剛山 護世四鎮 起問梵王
大師梵尊 天中自在 能除疑惑 當為我斷

D02 四王請事

有二：①問，②結。

E01 問

云何是人 得名為天 云何人王 復名天子

就問中有三事：

①初二句，問何故是人，而名為天。

②次一句，問何故是人，而獨名王。

③後一句，問何故人王，而名天子。

問云雖在人中，以正法治世，故而名為天耶？

此是結第一問。第二第三略不結也。

E02 結

生在人中 處王宮殿 正法治世 而名為天

C03 釋

有二：①許說，②正答。

D01 許說

護世四王 問是事已 時梵尊師 即說偈言

汝今雖以 此義問我 我要當為 一切眾生
敷揚宣暢 第一勝論

D02 正答

有二：①略答問正論之體，②廣答顯正論之相。

E01 略答問正論之體

有三：①答第二問，②答第三問，③追答第一問。

F01 答第二問

因集業故 生於人中 王領國土 故稱人王
云雖同是人，而統領國土，故名為王。

F02 答第三問

處在胎中 諸天守護 或先守護 然後入胎

①明在胎內，為天所護，故曰天子。

雖在人中 生為人王 以天護故 復稱天子

②明胎外為天所養，故名天子。

三十三天 各以己德 分與是人 故稱天子

③明長大之後天德分與，故名天子。

神力所加 故得自在

④結。為天神力所加故。得自在名為天也。

F03 追答第一問

遠離惡法 遮令不起

①明以天律滅惡，故名為天。

安住善法 修令增廣

②明以天律生善，故名令生天為天。

能令眾生 多生天上

③明以天律令生天上，故名為天。

E02 廣答顯正論之相

有二：①廣治化人德，②廣治化正論。

F01 廣治化人德

有二：①依名辨德，②釋疑顯德。

G01 依名辨德

半名人王 亦名執樂 羅刹魁膾 能遮諸惡

亦名父母 教誨修善

半名人王者，言一邊名天，一邊名人，故名為半。此二名，人天一雙。

亦名執樂者，執世中禮樂，以化人安樂，故名執樂。

亦名羅刹者，作惡之人，於王生怖，故名羅刹。此二名，與樂生怖一雙也。

言魁膾者，貨魚典宰曰膾，貨猪典宰曰魁。

呪國主斷惡並非，故言能遮諸惡。

名父母者，教修善法，故名父母。此是遮惡教善一雙。

依名辨德竟。

G02 釋疑顯德

有二：①疑，②釋。

H01 疑

示現果報 諸天所護

初疑云：若人王如羅刹膾魁，令人怖畏者，何故為天所護。

H02 釋

善惡諸業 現在未來 現受果報 諸天所護

疑云：若鞭撻等苦，但令怖畏者，爾此現苦，無因而得耶？

釋云：善惡業果，現在未來故。鞭撻等苦，是現受苦報，非是無因也。

人王示現，作惡有報，故致鞭撻。令其怖畏，而無惡心。

為天所護，故言示現果報，諸天所護也。

F02 廣治化正論

有三：①明人王縱惡，則禍生國敗。②明人王修善，則福至土豐。③結勸捨惡從善。

G01 明人王縱惡，則禍生國敗

有四：①明人民起惡，②明國主起惡，③明諸臣起惡，④總結。

H01 明人民起惡

有三：①明作惡因，②明得苦果，③結。

I01 明作惡因

若有惡事	縱而不問	不治其罪	不以正教
捨遠善法	增長惡趣	故使國中	多諸姦鬥

I02 明得苦果

三十三天	各生瞋恨		
由其國王	縱惡不治	壞國正法	姦詐熾盛
他方怨敵	競來侵掠	自家所有	錢財珍寶
諸惡盜賊	共來劫奪		

I03 結

如法治世	不行是事	若行是者	其國殄滅
------	------	------	------

譬如狂象 踏蓮花池
不應行。

H02 明國主起惡

有三：①表明得苦果，②明作惡因，③廣明惡果。

I01 表明得苦果

暴風卒起 屢降惡雨 惡星數出 日月無光

五穀果實 咸不滋茂

所謂風雨不調，星宿失度、果實不登，三種果也。

I02 明作惡因

由王捨正 使國饑饉 天於宮殿 悉懷愁惱

由王暴虐 不修善事

是諸天王 各相謂言 是王行惡 與惡為伴

以造惡故 速得天瞋

I03 廣明惡果

有二：①總明國敗，②別明惡果。

J01 總明國敗

以天瞋故 不久國敗

J02 別明惡果

非法兵仗 姦詐鬥訟 疾疫惡病 集其國土

諸天即便 捨離是王 令其國敗 生大愁惱

兄弟姊妹 眷屬妻子 孤迸流離 身亦滅亡

流星數墮 二日並現

他方惡賊 侵掠其土 人民飢餓 多諸疾疫

所重大臣 捨離薨亡 象馬車乘 一念喪滅

諸家財產 國土所有 互相劫奪 刀兵而死

五星諸宿 違失常度 諸惡疾疫 流遍其國

所謂疾病、國敗、眷屬分離、災怪、惡賊、餓飢、死、正財物散失，星宿失度等也。

H03 明諸臣起惡

有三：①臣行非法，②明人王許可，③明得苦報。

I01 臣行非法

諸受寵祿 所任大臣 及諸群僚 專行非法

I02 明人王許可

如是行惡 偏受恩遇 修善法者 日日衰滅

於行惡者 而生恭敬 見修善者 心不顧錄

許可者，所謂惡臣偏受王恭敬。良臣衰滅，亦不顧錄也。

I03 明得苦報

有二：①開章門，②釋。

J01 開章門

有二：①明得惡相，②明有惡果。

K01 明得惡相

故使世間 三異並起 星宿失度 降暴風雨

惡相者，三異並起。

三異者，謂星宿失度暴風惡雨也。

K02 明有惡果

破壞甘露 無上正法 眾生等類 及以地肥

惡果者，所謂壞出世正法、世間眾生正報，及地肥依報也。

J02 釋

有三：①舉惡因，②明得果。③結。

K01 舉惡因

恭敬弊惡 毀諸善人

K02 明得果

故天降雹 飢餓疫病 穀米果實 滋味衰減

多病眾生 充滿其國 甘美盛果 日日損減

苦澀惡味 隨時增長

得果者，所謂雹餓疫死。穀果衰減。多病滿國。甘菓減苦味增也。

本所遊戲 可愛之處 悉皆枯悴 無可樂者

眾生所食 精妙上味 漸漸損減 食無肥膚

顏貌醜陋 氣力衰微 凡所食啖 不知厭足

力精勇猛 悉滅無有 嬾惰懈怠 充滿其國

廣釋。

K03 結

多有病苦 逼切其身 惡星變動 羅刹亂行

H04 總結

有三：①明令王民作惡，②明令得苦，③明皆由王爾也。

I01 明令王民作惡

若有人王 行於非法 增長惡伴 損人天道

I02 明令得苦

於三有中 多受苦惱

I03 明皆由王爾

起如是等 無量惡事 皆由人王 愛著眷屬

縱之造惡 捨而不治

G02 明人王修善，則福至土豐

有三：①明王不作惡，則人民行善生天。②明人民作惡得苦，由王縱惡不治。③明國王治，即得國豐樂。

H01 明王不作惡，則人民行善生天

若為諸天 所護生者 如是人王 終不為是

有行善者 得生天中

H02 明人民作惡得苦，由王縱惡不治

行不善者 墮在三塗 三十三天 皆生焦熱

由王縱惡 捨而不治 違逆諸天 及父母勅

不能正治 則非孝子

H03 明國王治即得國豐樂

有三：①通誠惡勸善，②偏明作惡國敗，③偏明行善土豐。

I01 通誠惡勸善

起諸姦惡 壞國土者 不應縱捨 當正治罪

是故諸天 護持是王 以滅惡法 修習善故

現世正治 得增王位 應各為說 善不善業

能示因果 故得為王

諸天護持 鄰王佐助 為自為他 修正治國

有壞國者 應當正教 為命及國 修行正法

I02 偏明作惡國敗

不應行惡 惡不應縱 所有餘事 不能壞國

要因多姦 然後傾敗 若起多姦 壞於國土

譬如大象 壞蓮花池 怨恨諸天 故天生惱

起諸惡事 彌滿其國 是故應隨 正法治世

I03 偏明行善土豐

以善化國 不順非法 寧捨身命 不愛眷屬

於親非親	心常平等	視親非親	和合為一
正行名稱	流布三界	正法治國	人多行善
常以善心	仰瞻國王	能令天眾	具足充滿
是故正治	名為人王		
一切諸天	愛護人王	猶如父母	擁護其子
故令日月	五星諸宿	隨其分齊	不失常度
風雨隨時	無諸災禍	令國豐實	安樂熾盛
增益人民	諸天之眾		

G03 結勸捨惡從善

以是因緣	諸人王等	寧捨身命	不應為惡
------	------	------	------

不應捨離 正法珍寶

由正法寶 世人受樂 常當親近 修正法者

聚集功德 莊嚴其身 於自眷屬 常知止足

當遠惡人 修治正法 安止眾生 於諸善法

教勅防護 令離不善

是故國土 安隱豐樂 是王亦得 威德具足

隨諸人民 所行惡法 應當調伏 如法教詔

是王當得 好名善譽 善能攝護 安樂眾生

⑫ 善集品

善集即是釋迦本身，寶冥即是阿閼本身。品中明善集王事，故以為名。

就品有二：①長行，②偈釋。

A01 長行

爾時，如來復為地神，說往昔因緣，而作偈言：

A02 偈釋

有二：①明因，②明得果。

B01 明因

有二：①明布施行，②明智慧行。

C01 明布施行

布施行有四：

我昔曾為 轉輪聖王 捨四大地 及以大海

捨國城。

又於是時 以四天下 滿中珍寶 奉上諸佛
捨珍寶。

凡所布施 皆捨所重 不見可愛 而不捨者
捨眷屬。

於過去世 無數劫中 求正法故 常捨身命
捨身命。

C02 明智慧行

有二：①明求法因緣，②正聽法。

D01 明求法因緣

又過去世	不可議劫	有佛世尊	名曰寶勝
其佛世尊	般涅槃後	時有聖王	名曰善集
於四天下	而得自在	治正之勢	盡大海際
其王有城	名水音尊	於其城中	止住治化
夜睡夢中	聞佛功德	及見比丘	名曰寶冥
善能宣暢	如來正法	所謂金光	微妙經典
明如日中	悉能遍照		
是轉輪王	夢是事已	即尋覺寤	心喜遍身
即出宮殿	至僧坊所	供養恭敬	諸大聖眾
問諸大德	是大眾中	頗有比丘	名曰寶冥

成就一切	諸功德不		
爾時寶冥	在一窟中	安坐不動	思惟正念
讀誦如是	金光明經		
時有比丘	即將是王	至其所止	到寶冥所
時此寶冥	故在窟中	形貌殊特	威德熾然
即示王言	是窟中者	即是所問	寶冥比丘
能持甚深	諸佛所行	名金光明	諸經之王
時善集王	即尋禮敬	寶冥比丘	作如是言
面如滿月	威德熾然	惟願為我	敷演宣說
是金光明	諸經之王		

D02 正聽法

有四：①明受請，②正為說經，③明聞法歡喜，④明報恩供養。

E01 明受請

時寶冥尊	即受王請	許為宣說	是金光明
三千大千	世界諸天	知當說法	悉生歡喜
於淨微妙	鮮絜之處	種種珍寶	廁填其地
上妙香水	持用灑之	散諸好花	遍滿其處
王於是時	自敷法座	懸繒幡蓋	寶飾交絡
種種微妙	殊特末香	悉以奉散	大法高座
一切諸天	龍及鬼神	摩睺羅伽	緊那羅等

即雨天上	曼陀羅花	遍散法座	滿其處所
不可思議	百千萬億	那由他等	無量諸天
一時俱來	集說法所		
是時寶冥	尋從窟出	諸天即時	以娑羅花
供養奉散	寶冥比丘		

E02 正為說經

是時寶冥	淨洗身體	著淨妙衣	至法座所
合掌敬禮	是法高座		
一切天王	及諸天人	雨曼陀羅	大曼陀羅
摩訶曼殊	眾妙寶花		

無量百千	種種伎樂	於虛空中	不鼓自鳴
寶冥比丘	能說法者	尋上高座	結跏趺坐
即念十方	不可思議	無量千億	諸佛世尊
於諸眾生	興大悲心	及善集王	所得王領
盡一日月	所照之處		
時說法者	即尋為王	敷揚宣說	是妙經典

E03 明聞法歡喜

是時大王	為聞法故	於比丘前	合掌而立
聞於正法	讚言善哉	其心悲悼	涕淚交流
尋復踊悅	心意熙怡		

E04 明報恩供養

為欲供養	此經典故	爾時即提	如意珠王
為諸眾生	發大誓願	願於今日	此閻浮提
悉雨無量	種種珍異	瑰琦七寶	及妙瓔珞
以是因緣	悉令無量	一切眾生	皆受快樂
即於爾時	尋雨七寶	及諸寶飾	天冠耳璫
種種瓔珞	甘饌寶座	悉皆充滿	遍四天下
時王善集	即持如是	滿四天下	無量七寶
於寶勝佛	遺法之中	以用布施	供養三寶

B02 明得果

有三：①結會古今，②明得果，③合結因果。

C01 結會古今

爾時為王	說法比丘	於今現在	阿闍佛是
時善集王	聽受法者	今則我身	釋迦文是

C02 明得果

我於爾時	捨此大地	滿四天下	珍寶布施
得聞如是	金光明經		
聞是經已	一稱善哉	以此善根	業因緣故
身得金色	百福莊嚴	常為無量	百千萬億
眾生等類	之所樂見		

既得見已	無有厭足	過去九十	九億千劫
常得作於	轉輪聖王		
亦於無量	百千劫中	常得王領	諸小國土
不可思議	劫中常作	釋提桓因	及淨梵王
復得值遇	十力世尊	其數無量	不可稱計

C03 合結因果

所得功德	無量無邊	皆由聞經	及稱善哉
如我所願	成就菩提	正法之身	我今已得

⑬ 鬼神品

明四眾聽受，則有勝善，為鬼神所護，故從之受名。

有三：①勸眾聽受，②明八部守護，③明具諸勝果。

A01 勸眾聽受

有二：①正勸聽受，②歎經力大。

B01 正勸聽受

有二：①長行，②偈。

C01 長行

有三：①舉供養諸佛功德，②舉智，③勸云欲得如上功德智慧應聽是經。

D01 舉供養諸佛功德

佛告功德天：若有善男子善女人，欲以不可思議妙供養具，供養過去未來現在諸佛世尊。

D02 舉智

及欲得知三世諸佛甚深行處。

佛所行第一義處。

D03 勸云欲得如上功德智慧應聽是經

是人，應當必定至心，隨有是經流布之處，若城邑村落、舍宅空處，正念不亂，至心聽是微妙經典。

C02 偈

爾時，世尊欲重宣此義，而說偈言：

若欲供養 一切諸佛 欲知三世 諸佛行處
應當往彼 城邑聚落 有是經處 至心聽受

B02 歎經力大

有二：①正歎經力，②舉益勸聽。

C01 歎經力

有二：①歎拔苦力，②歎生福慧。

D01 歎拔苦力

有二：①歎經力，②明拔苦惱。

E01 歎經力

是妙經典 不可思議 功德大海 無量無邊

E02 明拔苦惱

能令一切 眾生解脫 度無量苦 諸有大海

D02 歎生福慧

於中有二：①明歎經德，②明生福慧。

E01 明歎經德

是經甚深 初中後善 不可得說 譬喻為比

假使恆沙 大地微塵 大海諸水 一切諸山

如是等物 不得為喻

初中後善者，明戒定慧，是三也。亦可序正流通，為三也。

E02 明生福慧

有二：①明生智慧，②明生功德。

F01 明生智慧

若入是經 即入法性 如深法性 安住其中

即於是典 金光明中 而得見我 釋迦牟尼

入法性者，明證法身也。得見我者，謂見應化二身也。

F02 明生功德

不可思議 阿僧祇劫 生天人中 常受快樂

以能信解 聽是經故 如是無量 不可思議

功德福聚 悉已得之

C02 舉益勸聽

有二：①正勸忍苦聽受，②明聽經有益。

D01 勸忍苦聽受

隨所至處 若百由旬 滿中盛火 應從中過

若至聚落 阿蘭若處 到法會所 至心聽受

D02 明聽經有益

有三：①明聽者滅惡相，②明說者得勝相，③令得勝果。

E01 明聽者滅惡相

聽是經故 惡夢蠱道 五星諸宿 變異災禍

一切惡事 消滅無餘

E02 明說者得勝相

於說法處 蓮花座上 說是經典 書寫讀誦

是說法者 若下法座 爾時大眾 猶見坐處

故有說者 或佛世尊 或見佛像 菩薩色像

普賢菩薩 文殊師利 彌勒大士 及諸形像

見如是等 種種事已 尋復滅盡 如前無異

勝相者，言若下法坐，而為大眾，於法座上猶見佛菩薩色像及餘形色等事，如前無異者，言本時無如此相，滅後亦無如前也。

E03 令得勝果

有二：①明得勝果，②結。

F01 明得勝果

成就如是 諸功德已 而為諸佛 之所讚歎

威德相貌 無量無邊 有大名稱 能卻怨家

他方盜賊 能令退散 勇捍多力 能破強敵

惡夢惱心 無量惡業 如是惡事 皆悉寂滅

若入軍陣 常能勝他

勝果者，言內有諸佛所讚威德名稱，外破怨敵惡夢惡業。入陣勝他等事也。

F02 結

名聞流布 遍閻浮提 亦能摧伏 一切怨敵

遠離諸惡 修習諸善 入陣得勝 心常歡喜

A02 八部守護

有四：①明供養，②明恭敬，③明讚歎，④明擁護。

B01 明供養

大梵天王	三十三天	護世四王	金剛密迹
鬼神諸王	散脂大將	禪那英鬼	及緊那羅
阿耨達龍	娑竭羅王	阿修羅王	迦樓羅王
大辯天神	及功德天	如是上首	諸天神等
常當供養	是聽法者		

B02 明恭敬

生不思議	法塔之想	眾生見者	恭敬歡喜
諸天王等	亦各思惟	而相謂言	
令是眾生	無量威德	皆悉成就	
若能來至	是法會所	如是之人	成上善根

若有聽是 甚深經典 故嚴出往 法會之處
心生不可 思議正信 供養恭敬 無上法塔

B03 明讚歎

如是大悲 利益眾生 即是無量 深法寶器
能入甚深 無上法性 由以淨心 聽是經典
如是之人 悉已供養 過去無量 百千諸佛
以是善根 無量因緣 應當聽受 是金光明

B04 明擁護

如是眾生 常為無量 諸天神王 之所愛護
大辯功德 護世四王 無量鬼神 及諸力士

晝夜精進	擁護四方	令無災禍	永離諸苦
釋提桓因	及日月天	閻摩羅王	風水諸神
違馱天神	及毘紐天	大辯天神	及自在天
火神等神	大力勇猛	常護世間	晝夜不離
大力鬼王	那羅延等	摩醯首羅	二十八部
諸鬼神等	散脂為首	百千鬼神	神足大力
擁護是等	令不怖畏		
金剛密迹	大鬼神王	及其眷屬	五百徒黨
一切皆是	大菩薩等	亦悉擁護	聽是經者
摩尼跋陀	大鬼神王	富那跋陀	及金毘羅

阿羅婆帝	賓頭盧伽	黃頭大神	一一諸神
各有五百	眷屬鬼神	亦常擁護	聽是經者
質多斯那	阿修羅王	及乾闥婆	那羅羅闍
祁那娑婆	摩尼乾陀	及尼捷陀	主雨大神
大飲食神	摩訶伽吒	金色髮神	半祁鬼神
及半支羅	車鉢羅婆	有大威德	
婆那利神	曇摩跋羅	摩竭婆羅	針髮鬼神
繡利蜜多	勒那翅奢	摩訶婆那	及軍陀遮
劍摩舍帝	復有大神	奢羅蜜帝	醯摩跋陀
薩多琦梨	多醯波醯	阿伽跋羅	支羅摩伽

央掘摩羅	如是等神	皆有無量	神足大力
常勤擁護	聽受如是	微妙經者	
阿耨達龍	娑伽羅王	日真鄰王	伊羅鉢王
難陀龍王	跋難陀王	有如是等	百千龍王
以大神力	常來擁護	聽是經者	晝夜不離
波利羅睺	阿修羅王	毘摩質多	及以茂脂
睺摩利子	波訶梨子	佉羅騫陀	及以撻陀
是等皆是	阿修羅王	有大神力	常來擁護
聽是經者	晝夜不離		
訶利帝南	鬼子母等	及五百神	常來擁護

聽是經者 若睡若寤

旃陀旃陀 利大鬼神 女等鳩羅 鳩羅檀提

啖人精氣 如是等神 皆有大力 常勤擁護

十方世界 受持經者

大辯天等 無量天女 功德天等 各與眷屬

地神堅牢 種植園林 果實大神 如是諸神

心生歡喜 悉來擁護 愛樂親近

A03 具諸勝果

有二：①別明八事，②總結。

B01 別明八事

是經典者 於諸眾生 增命色力

功德威貌 莊嚴倍常

增色力。

五星諸宿 變異災怪 皆悉能滅 無有遺餘

夜臥惡夢 寤則憂悴 如是惡事 皆悉滅盡

除禍災。

地神大力 勢分甚深 是經力故 能變其味

如是大地 至金剛際 厚十六萬 八千由旬

其中氣味 無不遍有 悉令涌出 潤益眾生

是經力故 能令地味 悉出地上 厚百由旬

出地肥。

亦令諸天 大得精氣 充益身力 歡喜快樂

閻浮提內 所有諸神 心生歡喜 受樂無量

生快樂。

是經力故 諸天歡喜 百穀果實 皆悉滋茂

園苑叢林 其花開敷 香氣氤氳 充溢彌滿

百草樹木 生長端直 其體柔軟 無有斜戾

生穀果草木。

閻浮提內 所有龍女 其數無量 不可思議

心生歡喜 踊躍無量 在在處處 莊嚴花池

於其池中 生種種花 優鉢羅花 波頭摩花

拘物頭花 分陀利花

生好花。

於自宮殿 除諸雲霧 令虛空中 無有塵翳

諸方清徹 淨潔明了 日王赫焰 放千光明

歡喜踊躍 照諸閻蔽 閻浮檀金 以為宮殿

止住其中 威德無量 日之天子 及以月天

聞是經故 精氣充實

是日天子 出閻浮提 心生歡喜 放於無量

光明明網 遍照諸方

即於出時 放大光網 開敷種種 諸池蓮花
閻浮提內 無量果實 隨時成熟 飽諸眾生
光明照益 。

是時日月 所照殊勝 星宿正行 不失度數
風雨隨時 豐實熾盛 多饒財寶 無所乏少
陰陽調適 。

B02 總結

是金光明 微妙經典 隨所流布 讀誦之處
其國土境 即得增益 如上所說 無量功德

⑭ 授記品

授者，與也。記者，決也。與信相等決得佛果，故名授記品。

因緣者。言天子內有修行善因。外有如來本願之緣。故名因緣。又復聞經生淨心善因。依聞大士授記之緣故得授記。以隨相修者謂六波羅蜜等行。言此天子已於過去隨緣相造修行也。

有四：①明受記眾集。②明授記。③明樹神生疑。④如來釋疑。

A01 明受記眾集

爾時，如來將欲為是信相菩薩，及其二子銀相、銀光，授阿耨多羅三藐三菩提記。

是時，即有十千天子，威德熾王而為上首，俱從忉利來至佛所，頂禮佛足，卻坐一面。

A02 明授記

有三：①明信相記，②明二子記，③明諸天記。

B01 明信相記

爾時，佛告信相菩薩：汝於來世，過無量無邊百千萬億不可稱計那由他劫，金照世界，當成阿耨多羅三藐三菩提，號金寶蓋山王，如來．應供．正遍知．明行足．善逝．世間解．無上士．調御丈夫．天人師．佛世尊。

B02 明二子記

乃至，是佛般涅槃後，正法像法皆滅盡已，長子銀相當於是界，次補佛處，世界爾時轉名淨幢，佛名閻浮檀金幢光照明，如來．應供．正遍知．明行足．善逝．世間解．無上士．調御丈夫．天人師．佛世尊。

乃至，是佛般涅槃後，正法像法悉滅盡已，次子銀光，復於是後次補佛處，世界名字如本不異，佛號曰金光照，如來．應供．正遍知．明行足．善逝．世間解．無上士．調御丈夫．天人師．佛世尊。

B03 明諸天記

是十千天子聞三大士得受記莚，復聞如是《金光明經》，聞已歡喜，生殷重心。心無垢累，如淨琉璃。清淨無礙，猶如虛空。

爾時，如來知是十千天子善根成熟，即便與授菩提道記：汝等天子！於當來世，過阿僧祇百千萬億那由他劫，於是世界，當成阿耨多羅三藐三菩提，同共一家，一姓，一名，號曰青目優鉢羅花香山，如來．應供．正遍知．明行足．善逝．世間解．無上士．調御丈夫．天人師．佛世尊。

如是，次第出現於世，凡一萬佛。

A03 明樹神生疑

有三：①略表，②廣釋，③結請。

B01 略表

爾時，道場菩提樹神，名等增益，白佛言：

B02 廣釋

世尊！是十千天子，於忉利宮，為聽法故，故來集此。云何如來便與授記？

世尊！我未曾聞是諸天子修行具足六波羅蜜，亦未曾聞捨於手足、頭目、髓腦、所愛妻子、財寶、穀帛、金銀、琉璃、硨磲、碼瑙、真珠、珊瑚、珂貝、璧玉、甘饌飲食、衣服、臥具、病瘦醫藥、象馬車乘、殿堂屋宅、園林泉池、

奴婢僕使。

如餘無量百千菩薩，以種種資生供養之具，恭敬供養過去無量百千萬億那由他等諸佛世尊。

如是菩薩，於未來世，亦捨無量所重之物，頭目、髓腦、所愛妻子、財寶、穀帛，乃至僕使。次第修行，成就具足六波羅蜜。成就是已，備修苦行，動經無量無邊劫數，然後方得受菩提記。

B03 結請

世尊！是天子等，何因何緣，修行何等勝妙善根，從彼天來，暫得聞法，便得受記？惟願，世尊！為我解說，斷我疑網。

A04 如來釋疑

有三：①略表，②釋，③結。

B01 略表

爾時，佛告樹神：善女天！皆有因緣，有妙善根，以隨相修。

B02 釋

何以故？以是天子，於所住處，捨五欲樂故，來聽是《金光明經》。既聞法已，於是經中，淨心殷重，如說修行。復得聞此三大菩薩受於記莂，亦以過去本昔發心誓願因緣。

B03 結

是故，我今皆與受記，於未來世，當成阿耨多羅三藐三菩提。

⑮ 治病品

此品明釋迦昔日大悲治病故，名治病品。

有二：①誠許說。②明正說。

A01 誠許說

佛告道場菩提樹神：善女天！諦聽，諦聽！善持憶念，我當為汝演說往昔誓願因緣。

A02 明正說

有二：①述本生，②明本事。

B01 述本生

有二：①明本生時處，②明本生。

C01 明本生時處

過去無量不可思議阿僧祇劫，爾時有佛出現於世，名曰寶勝，如來．應供．正遍知．明行足．善逝．世間解．無上士．調御丈夫．天人師．佛世尊。

善女天！爾時，是佛般涅槃後，正法滅已，於像法中，有王名曰天自在光王，修行正法，如法治世，人民和順，孝養父母。

C02 明本生

是王國中，有一長者名曰持水，善知醫方，救諸病苦，方便巧知四大增損。

善女天！爾時，持水長者家中，後生一子名曰流水，體貌殊勝，端正第一，形色微妙，威德具足，受性聰敏，善解諸論，種種技藝書疏算計，無不通達。

B02 明本事

有二：①明慈悲體，②明慈悲用。

C01 明慈悲體

有五：①明國人有病，②明思惟欲救，③明請問醫方，④明父為說，⑤明聞說得解。

D01 明國人有病

是時，國內天降疫病。有無量百千諸眾生等皆無免者，為諸苦惱之所逼切。

D02 明思惟欲救

善女天！爾時，流水長者子見是無量百千眾生受諸苦惱故。為是眾生，生大悲心。作是思惟：「如是無量百千眾生，受諸苦惱。我父長者雖善醫方，能救諸苦，方便巧知四大增損。年已衰邁，老耄枯悴，皮緩面皺，羸瘦顫掉，行來往反要因几杖，困頓疲乏，不能至彼城邑聚落。而是無量百千眾生復遇重病，

無能救者。我今當至大醫父所，諮問治病醫方祕法。諮稟知己，當至城邑聚落村舍治諸眾生種種重病，悉令得脫無量諸苦。」

D03 明請問醫方

有二：①發起，②正問。

E01 發起

時，長者子思惟是已，即至父所，頭面著地，為父作禮，叉手卻住，以四大增損而問於父。即說偈言：

E02 正問

有四：①問病因緣，②問病飲食，③問病醫藥，④問時節。

F01 問病因緣

云何當知 四大諸根 衰損代謝 而得諸病

病因緣者，是四大五藏五緣。

四大不調，五藏傷損，令諸根有病。如肝惡，眼病；腎惡，耳聾也。

生病五緣：多坐多眠，得水病；多行多倚多語，生風病。又多坐，生熱病；多姪，生一切病，則等分病也。又火少，令痰飲多；若火多，令熱多。若風多吹火增熱，水多痰增冷也。

F02 問病飲食

云何當知 飲食時節 若食食已 身火不滅

病飲食者有六：①過量食，②小量食，③過時食，大飢方食，④逆時食，未飢強與，⑤妨礙食，食肉竟飲生乳等，⑥不曾食而強食之。

如南人飲漿，北人如飲乳。又蘇蜜等分，服之即死。又苦菜和蜜食，令不能男，並是妨礙食。

又，風病人，食冷濕味，令人度壽。若熱病飲酒，食小麥生牛肉等，令人失眼咄血。若痰病，食甜肥辛酢，令人嘔鼻多汁癰下等。

文言身火不滅者，若食飽熱病，應息而不息者，有病故也。

F03 問病醫藥

云何當知 治風及熱 水過肺病 及以等分

水過損肺，即是痰病也。

治病藥者，病難有四：①風，②痰，③熱，④等分。

此四種，各有三品：①可治，此是新病，四大猶強也。②恆治不瘥，此是四

大過傷也。③不可治，見有必死相故。

若論藥品，如下文說。

F04 問時節

何時動風 何時動熱 何時動水 以害眾生

病時節者：

①四月五月，風生時。②六月七月，風病起時。③八月九月，風滅時。

①六月七月，熱生時。②八月九月，熱起時。③十月至正月，熱滅時。

①十月至正月，水生時。②二月三月，水病起時。③四月至七月，水病滅時也。

D04 明父為說

有二：①佛序父答，②父答。

E01 佛序父答

時，父長者，即以偈頌，解說醫方，而答其子：

E02 父答

有二：①定時節，②治病之方。

F01 定時節

三月是夏 三月是秋 三月是冬 三月是春

是十二月 三三而說 從如是數 一歲四時

若二二說 足滿六時 三三本攝 二二現時

三三本攝者，解有二師。

初解云：一年有四時，謂春夏秋冬。春為氣首，冬為氣末。

一時之中，各有三月日，謂孟仲季。正月孟春，二月仲春，三月季春。後三時例爾。

正月為本，攝後兩月，悉屬春分。四月為本，攝後兩月，悉屬夏分。七月為本，攝後兩月，悉屬秋分。十月為本，攝後兩月，悉屬冬分。

四時各有三月，故言三三而說。初月為本，攝後三月，故云三三本攝，此是本攝末。

又言正月二月，正是春時，木於中王。土寄三月，攝屬春時。四月五月，正是夏時，火於中王。土寄六月，攝屬夏時。七月八月，正是秋時，金於中王。土寄九月，攝屬秋時。十月十一月，正是冬時，水於中王。

土寄臘月，攝屬冬時。土寄四季，以正時為本，各各三月，並攝於中，土故言三，三本攝，此是主攝客。客是土也。

第二解云：依佛法中，年有三時，謂冬春夏。冬為氣首，夏為氣末。一時之中，各有四月，廢去秋時。三時之中各攝秋時，一月故，一時中，有四月日，故言三三本攝。

初三字，舉秋時三月也。次三本字，謂冬春夏中本三月也。

四時之中，何故偏廢秋時者，釋言：凡有二義：

①為破保常之執。秋時成就，人皆此時保常為樂故。欲破其執，廢去秋時。

②開後安居立迦提月，安居本名夏坐。八月半以還，若是秋時，便成秋坐，故宜廢之也。

二二現時者，亦有二解：

第一解言：四時之中，各二月日，以為正時。土寄四季，各以月日，攝屬陰陽，合成六時。

六時者：正月二月，是木王現時。四月五月，是火王現時。七月八月，是金王現時。十月十一月，是水王現時。十二月三月，是陽土寄王。六月九月，是陰土寄王。王名為現。故言二二現時，足滿六時。

第二解言：依法三時，時有四月，各有初分後分，合成六時。

六時者：從臘月十六日至二月十五日，此二月，是春時初分現。從二月十六日至四月十五日，此二月是春時後分現。從四月十六日至六月十五日，此二月是夏時初分現。從六月十六日至八月十五日，此二月是夏時後分現。從八月十

六日至十月十五日，此二月是冬時初分現。從十月十六日至臘月十五日，此二月是冬時後分現。故言若二二說，足滿六時。

F02 治病之方

有二：①明隨時發病，②明違時動病。

G01 明隨時發病

有七：①答病飲食問，②答病因緣問，③答病湯藥問，④答病時節問，⑤重答治病藥問，⑥重答病飲食問，⑦重答治病藥問。

H01 答病飲食問

隨是時節 消息飲食 是能益身 醫方所說
示未得病前，以藥防護。

醫方所說者：謂本草諸藥，方中明飲食，有宜、不宜。不宜，不依之也。

H02 答病因緣問

隨時歲中 諸根四大 代謝增損 令身得病

明得病時，以藥治之。

代謝增損者，謂四時來去，四大增損也。

H03 答病湯藥問

有善醫師 隨順四時 三月將養 調和六大

隨病飲食 及以湯藥

明治病之後，以藥補之。

六大者，即是六府：大腸、小腸、脾、三焦，二傍光。

H04 答病時節問

多風病者 夏則發動 其熱病者 秋則發動

等分病者 冬則發動 其肺病者 春則增劇

風病夏動者，夏毛孔開通，外風得入故也。

熱病秋動者，秋時毛孔閉塞熱伏，內不通故也。

等分冬發者，春時動水肺，病不瘥。至秋動熱，熱病不瘥。至冬具動，一切病故也。

肺病春增者，二月三月，是二陰痰病起時故也。

H05 重答治病藥問

有風病者 夏則應服 肥膩醢酢 及以熱食

有熱病者 秋服冷甜 等分冬服 甜酢肥膩

肺病春服 肥膩辛熱

風病夏服肥膩等者，夏月毛孔開通，宜以肥膩塞之。

醎酢性熱消水，令體堅實，令風不入。

熱食流汗風出，又治虛冷，風不得入也。

冷甜即是蘇乳等，能治熱也。

等分冬服甜酢肥膩，肥膩治風也。

肺病服肥膩者，毛孔令水不入。辛熱消水，故能治肺病也。

H06 重答病飲食問

飽食然後 則發肺病 於食消時 則發熱病

食消已後 則發風病 如是四大 隨三時發
飽發肺病者，食飽既多，腸胃盈滿，故發肺病。
消時發熱者，始食爛蒸熱還，發食消也。風聚虛中故，發風病。

H07 重答治病藥問

風病羸損 補以酥膩 熱病下藥 服訶梨勒
等病應服 三種妙藥 所謂甜辛 及以酥膩
肺病應服 隨能吐藥
風以酥膩者，風虛疎故，以膩補之。
熱勢未盡，欲蕩治心腹，故服下藥也。
等分病，應以酥膩治風，以甜除熱，以辛除水。

肺病是水，宜服吐藥。

G02 明違時動病

若風熱病 肺病等分 違時而發 應當任師

籌量隨病 飲食湯藥

D05 明聞說得解

善女天！爾時，流水長者子問其父醫四大增損，因是得了一切醫方。

C02 明慈悲用

有三：①明善言慰喻，②輕病即愈，病重者與藥乃愈。③合結。

D01 明善言慰諭

時，長者子知醫方已，遍至國內城邑聚落，在在處處隨有眾生病苦者所，軟

言慰諭，作如是言：「我是醫師！我是醫師！善知方藥。今當為汝療治救濟，悉令除愈。」

善女天！爾時，眾生聞長者子軟言慰諭，許為治病，心生歡喜，踊躍無量。

D02 輕病即愈 病重者與藥乃愈

時，有百千無量眾生，遇極重病，直聞是言，心歡喜故，種種所患，即得除瘥，平復如本，氣力充實。

善女天！復有無量百千眾生，病苦深重，難除瘥者，即共來至長者子所。時長者子即以妙藥授之令服，服已除瘥，亦得平復。

D03 合結

善女天！是長者子，於其國內治諸眾生所有病苦，悉得除瘥。

①⑥ 流水長者子品

此品第二明記近因。與前三異：

①前於同類人道生慈，此中異類畜生生慈。

②前治身病之慈，此除心病之慈。

③前明世間之慈，此明出世之慈。

有此三異，是以此品名得記近因。

有三：①歎除病之德，②明救魚之功，③結會古今。

A01 歎除病之德

有二：①明長者除病，②明眾生修福。

B01 明長者除病

佛告樹神：爾時，流水長者子於天自在光王國內，治一切眾生無量苦患已，令其身體平復如本，受諸快樂。

B02 明眾生修福

以病除故，多設福業，修行布施，尊重恭敬是長者子，作如是言：「善哉！長者！能大增長福德之事，能益眾生無量壽命，汝今真是大醫之王，善治眾生無量重病，必是菩薩善解方藥。」

恭敬讚歎以報恩。

A02 明救魚之功

有二：①明長者救魚，②明十千魚報恩。

B01 明長者救魚

有二：①明夫妻二子本生，②明本生事。

C01 明夫妻二子本生

善女天！時，長者子有妻名曰水空龍藏，而生二子：一名水空，二名水藏。

C02 明本生事

有二：①明慈悲體，②明慈悲用。

D01 明慈悲體

明長者見魚，樹神教救，生慈悲心。

時，長者子將是二子，次第遊行城邑聚落，最後到一大空澤中，見諸虎狼狐犬鳥獸多食肉血，悉皆一向馳奔而去。

時，長者子作是念言：「是諸禽獸，何因緣故，一向馳走？我當隨後逐而觀

之。」

時，長者子遂便隨逐，見有一池，其水枯涸。於其池中，多有諸魚。

時，長者子見是魚已，生大悲心。

時，有樹神示現半身，作如是言：「善哉！善哉！大善男子！此魚可愍。汝可與水，是故號汝名為流水。復有二緣名為流水：一能流水，二能與水。汝今應當隨名定實。」

時，長者子問樹神言：「此魚頭數，為有幾所？」

樹神答言：「其數具足，足滿十千。」

善女天！爾時，流水聞是數已，倍復增益生大悲心。

D02 明慈悲用

有二：①明財施，②明法施。

E01 明財施

善女天！時此空池，為日所曝，唯少水在，是十千魚將入死門。四向宛轉，見是長者，心生恃賴，隨是長者所至方面，隨逐瞻視，日未曾捨。

是時，長者馳趣四方，推求索水，了不能得。便四顧望，見有大樹，尋取枝葉，還到池上與作陰涼。作陰涼已，復更推求是池中水本從何來？即出四向周遍求覓，莫知水處。復更疾走，遠至餘處，見一大河名曰水生。

爾時，復有諸餘惡人為捕此魚故，於上流懸嶮之處，決棄其水，不令下過。然其決處，懸嶮難補，計當修治經九十日。百千人功，猶不能成，況我一身？

時，長者子速疾還反，至大王所，頭面禮拜，卻住一面，合掌向王，說其因

緣。作如是言：「我為大王國土人民治種種病。漸漸遊行，至彼空澤，見有一池，其水枯涸，有十千魚為日所曝，今日困厄，將死不久。惟願，大王！借二十大象，令得負水，濟彼魚命。如我與諸病人壽命。」

爾時，大王即勅大臣，速疾供給。

爾時，大臣奉王告勅，語是長者：「善哉！大士！汝今自可至象廐中，隨意選取，利益眾生，令得快樂。」

是時，流水及其二子，將二十大象。從治城人，借索皮囊，疾至彼河上流決處，盛水象負，馳疾奔還，至空澤池，從象背上，下其囊水，瀉置池中，水遂彌滿還復如本。

時，長者子於池四邊彷徨而行。是魚爾時亦復隨逐，循岸而行。

時，長者子復作是念：「是魚，何緣隨我而行？是魚，必為飢火所惱。復欲從我求索飲食，我今當與。」

善女天！爾時，流水長者子告其子言：「汝取一象最大力者，速至家中，啟父長者：『家中所有可食之物，乃至父母飲啖之分，及以妻子奴婢之分，一切聚集。』悉載象上，急速來還。」

爾時，二子如父教勅，乘最大象，往至家中，白其祖父，說如上事。

爾時，二子收取家中可食之物，載象背上，疾還父所，至空澤池。

時，長者子見其子還，心生歡喜，踊躍無量，從子邊取飲食之物散著池中。

E02 明法施

與魚食已，即自思惟：「我今已能與此魚食，令其飽滿；未來之世，當施法

食。」復更思惟：「曾聞過去空閑之處，有一比丘，讀誦大乘方等經典，其經中說：『若有眾生，臨命終時，得聞寶勝如來名號，即生天上。』我今當為是十千魚解說甚深十二因緣，亦當稱說寶勝佛名。」

時，閻浮提中有二種人：一者深信大乘方等，二者毀訾，不生信樂。

時，長者子作是思惟：「我今當入池水之中，為是諸魚說深妙法。」

思惟是已，即便入水，作如是言：「南無過去寶勝，如來．應供．正遍知．明行足．善逝．世間解．無上士．調御丈夫．天人師．佛世尊。寶勝如來本往昔時行菩薩道，作是誓願：『若有眾生，於十方界，臨命終時，聞我名者，當令是輩即命終已，尋得上生三十三天。』」

爾時，流水復為是魚，解說如是甚深妙法，所謂無明緣行，行緣識，識緣名

色，名色緣六入，六入緣觸，觸緣受，受緣愛，愛緣取，取緣有，有緣生，生緣老死憂悲苦惱。

善女天！爾時，流水長者子及其二子說是法已，即共還家。

是長者子，復於後時，賓客聚會，醉酒而臥。

B02 明十千魚報恩

有三：①明生天，②明報恩，③明國王覺悟。

C01 明生天

爾時，其地卒大震動。時，十千魚同日命終。既命終已，生忉利天。

既生天已，作是思惟：「我等以何善業因緣，得生於此忉利天中？」復相謂言：「我等先於閻浮提內，墮畜生中，受於魚身。流水長者子與我等水及以飲

食，復為我等解說甚深十二因緣，并稱寶勝如來名號。以是因緣，令我等輩得生此天。是故，我等今當往至長者子所，報恩供養。」

C02 明報恩

爾時，十千天子從忉利天，下閻浮提，至流水長者子大醫王家。

時，長者子在樓屋上露臥眠睡。

是十千天子，以十千真珠、天妙瓔珞，置其頭邊。復以十千置其足邊，復以十千置右脇邊，復以十千置左脇邊。雨曼陀羅花、摩訶曼陀羅花，積至于膝。作種種天樂，出妙音聲。閻浮提中有睡眠者皆悉覺寤，流水長者子亦從睡寤。

是十千天子，於上空中飛騰遊行。於天自在光王國內，處處皆雨天妙蓮花。是諸天子，復至本處空澤池所，復雨天花。便從此沒，還忉利宮。隨意自在，

受天五欲。

C03 明國王覺悟

時，閻浮提過是夜已，天自在光王問諸大臣：「昨夜，何緣示現如是淨妙瑞相，有大光明？」

大臣答言：「大王！當知，忉利諸天於流水長者子家，雨四十千真珠瓔珞，及不可計曼陀羅花。」

王即告臣：「卿可往至彼長者家，善言誘諭，喚令使來。」

大臣受勅，即至其家，宣王教令喚是長者。

是時，長者尋至王所。

王問長者：「何緣示現如是瑞相？」

長者子言：「我必定知是十千魚其命已終。」

時大王言：「今可遣人審實是事。」

爾時，流水尋遣其子至彼池所，看是諸魚死活定實。

爾時，其子聞是語已，向於彼池。既至池已，見其池中多有摩訶曼陀羅花，積聚成積。其中諸魚，悉皆命終。

見已，即還，白其父言：「彼諸魚等，悉已命終。」

爾時，流水知是事已，復至王所，作如是言：「是十千魚，悉皆命終。」

王聞是已，心生歡喜。

A03 結會古今

爾時，世尊告道場菩提樹神：善女天！欲知爾時流水長者子，今我身是。長

子水空，今羅睺羅是。次子水藏，今阿難是。時十千魚者，今十千天子是。

是故，我今為其授阿耨多羅三藐三菩提記。

爾時，樹神現半身者，今汝身是。

⑪ 捨身品

明釋迦曾作王子，修大悲因，今得成佛，故言正顯壽量。佛既修因得果，信相何由不然，故言傍成授記。

此品明釋迦苦行以成壽量之果，傍顯授記。

有二：①問，②答。

A01 問

爾時，道場菩提樹神復白佛言：世尊！我聞世尊過去修行菩薩道時，具受無

量百千苦行，捐捨身命肉血骨髓。惟願，世尊！少說往昔苦行因緣，為利眾生受諸快樂。

A02 答

有三：①現寶塔，②明寶塔緣，③結酬上問。

B01 現寶塔

有二：①明現塔 眾喜神問 佛釋，②明現舍利 讚歎 禮拜。

C01 明現塔 眾喜神問 佛釋

爾時，世尊即現神足。神足力故，令此大地六種震動，於大講堂眾會之中，有七寶塔從地涌出，眾寶羅網彌覆其上。

爾時，大眾見是事已，生希有心。

爾時，世尊即從座起，禮拜是塔，恭敬圍繞，還就本座。

爾時，道場菩提樹神白佛言：世尊！如來世雄，出現於世，常為一切之所恭敬。於諸眾生，最勝最尊。何因緣故，禮拜是塔？

佛言：善女天！我本修行菩薩道時，我身舍利安止是塔。因由是身，令我早成阿耨多羅三藐三菩提。

C02 明現舍利 讚歎 禮拜

爾時，佛告尊者阿難：汝可開塔，取中舍利，示此大眾。是舍利者，乃是無量六波羅蜜功德所熏。

爾時，阿難聞佛教勅，即往塔所，禮拜供養，開其塔戶。見其塔中，有七寶函。以手開函，見其舍利，色妙紅白。而白佛言：世尊！是中舍利其色紅白。

佛告阿難：汝可持來，此是大士真身舍利。

爾時，阿難即舉寶函，還至佛所，持以上佛。

爾時，佛告一切大眾：汝等今可禮是舍利。此舍利者，是戒定慧之所熏修，甚難可得最上福田。

爾時，大眾聞是語已，心懷歡喜，即從座起，合掌敬禮大士舍利。

B02 明寶塔緣

有二：①說舍利因緣，②明寶塔因緣。

C01 說舍利因緣

有二：①長行，②偈頌。

D01 長行

有二：①經家標，②明如來說。

E01 經家標

爾時，世尊欲為大眾斷疑網故，說是舍利往昔因緣：

E02 明如來說

有二：①明本生，②明本事。

F01 明本生

阿難！過去之世，有王名曰摩訶羅陀，修行善法，善治國土，無有怨敵。

時有三子，端正微妙，形色殊特，威德第一。第一太子名曰摩訶波那羅，次子名曰摩訶提婆，小子名曰摩訶薩埵。

F02 明本事

有三：①明捨身因緣，②明捨身，③明眷屬悲苦。

G01 明捨身因緣

有三：①明遊山共議，②明見虎共議，③明思惟捨身。

H01 明遊山共議

是三王子，於諸園林遊戲觀看，次第漸到一大竹林，憩駕止息。

第一王子作如是言：「我於今日，心甚怖懾。於是林中，將無衰損？」

第二王子復作是言：「我於今日，不自惜身。但離所愛，心憂愁耳。」

第三王子復作是言：「我於今日，獨無怖懾，亦無愁惱。山中空寂，神仙所讚，是處閑靜，能令行人安隱受樂。」

H02 明見虎共議

時，諸王子說是語已，轉復前行。見有一虎，適產七日。而有七子，圍繞周匝。飢餓窮悴，身體羸瘦，命將欲絕。

第一王子見是虎已，作如是言：「怪哉！此虎，產來七日，七子圍繞，不得求食。若為飢逼，必還啖子。」

第三王子言：「此虎，經常所食何物？」

第一王子言：「此虎，唯食新熱肉血。」

第三王子言：「君等！誰能與此虎食？」

第二王子言：「此虎飢餓，身體羸瘦，窮困頓乏，餘命無幾，不容餘處為其求食。設餘求者，命必不濟，誰能為此不惜身命？」

第一王子言：「一切難捨，不過己身。」

第二王子言：「我等今者，以貪惜故，於此身命不能放捨。智慧薄少故，於是事而生驚怖。若諸大士欲利益他，生大悲心，為眾生者，捨此身命，不足為難。」

時，諸王子心大愁憂，久住視之，目未曾捨。作是觀已，尋便離去。

何由得知產來七日者，有四義：①虎子額上有七點，②見眼始開，③虎飢臨死，可知七日不食，④鬼神語之，如樹神導十千魚。但經不出耳。

H03 明思惟捨身

有三：①思惟捨身時至，②正思惟欲捨身，③發遣二兄。

I01 思惟捨身時至

爾時，第三王子作是念言：「我今捨身，時已到矣。」

I02 思惟欲捨身

有二：①思惟捨身 修涅槃因，②思惟捨身 求涅槃果。

J01 思惟捨身 修涅槃因

有二：①思此身有四非常，②思惟修因。

K01 思此身有四非常

何以故？我從昔來，多棄是身，都無所為。亦常愛護，處之屋宅。

又復，供給衣服、飲食、臥具、醫藥、象馬車乘，隨時將養，令無所乏。而不知恩，反生怨害。

明苦。

然，復不免無常敗壞。

明無常。

復次，是身不堅，無所利益。

明空、無我。

可惡如賊，猶若行廁。

明不淨。

K02 思惟修因

有二：①明自行，②明化他行。

L01 明自行

我於今日，當使此身作無上業。

L02 明化他行

於生死海中，作大橋梁。

J02 思惟捨身 求涅槃果

有二：①明思惟身患，②求涅槃果。

K01 明思惟身患

有三：①明苦、無常，②明空、無我，③明不淨。

L01 明苦無常

復次，若捨此身，即捨無量癰疽瘰疾百千怖畏。

是身，唯有大小便利，

L02 明空無我

是身不堅，如水上沫。

L03 明不淨

是身不淨，多諸蟲戶。是身可惡，筋纏血塗。皮骨髓腦，共相連持。

如是觀察，甚可患厭，

K02 求涅槃果

有二：①明自證，②明化他。

L01 明自證

有二：①明總求涅槃，②明別求三點。

M01 明總求涅槃

是故，我今應當捨離，以求寂滅無上涅槃。

M02 明別求三點

永離憂患無常變異，生死休息。

求解脫。

無諸塵累，無量禪定智慧功德，

求般若。

具足成就微妙法身，百福莊嚴，諸佛所讚。

求法身。

L02 明化他

證成如是無上法身，與諸眾生無量法樂。」

I03 發遣二兄

是時，王子勇猛堪任，作是大願，以上大悲熏修其心。慮其二兄心懷怖懼，

或恐固遮為作留難。即便語言：「兄等！今者，可與眷屬還其所止。」

G02 明捨身

有二：①明王子發願捨身，現種種瑞，②明為虎所食。

H01 明王子發願捨身，現種種瑞

爾時，王子摩訶薩埵還至虎所，脫身衣裳置竹枝上。作是誓言：「我今為利諸眾生故，證於最勝無上道故，大悲不動，捨難捨故。為求菩提，智所讚故。欲度三有諸眾生故，欲滅生死怖畏熱惱故。」

是時，王子作是誓已，即自放身臥餓虎前。

是時，王子以大悲力故，虎無能為。

王子復作如是念言：「虎今羸瘦，身無勢力，不能得我身血肉食。」

即起求刀。周遍求之，了不能得。即以乾竹刺頸出血，於高山上投身虎前。

是時，大地六種震動，日無精光，如羅睺羅阿修羅王捉持障蔽，又雨雜花種種妙香。

時，虛空中有諸餘天，見是事已，心生歡喜，歎未曾有。讚言：「善哉，善哉！大士！汝今真是行大悲者，為眾生故，能捨難捨。於諸學人，第一勇健。汝已為得諸佛所讚，常樂住處，不久當證無惱無熱清涼涅槃。」

H02 明為虎所食

是虎，爾時見血流出，污王子身，即便舐血，啖食其肉，唯留餘骨。

G03 明眷屬悲苦

有三：①明二兄悲苦，②明侍從悲苦，③明父母悲苦。

H01 明二兄悲苦

爾時，第一王子見地大動。為第二王子，而說偈言：

震動大地 及以大海 日無精光 如有覆蔽

於上虛空 雨諸花香 必是我弟 捨所愛身

第二王子復說偈言：

彼虎產來 已經七日 七子圍繞 窮無飲食

氣力羸損 命不云遠

小弟大悲 知其窮悴 懼不堪忍 還食其子

恐定捨身 以救彼命

時，二王子心大愁怖，涕泣悲歎，容貌憔悴。復共相將，還至虎所。見弟所

著帔服衣裳，皆悉在一竹枝之上，骸骨髮爪布散狼藉，流血處處，遍污其地。見已悶絕，不自勝持，投身骨上，良久乃蘇，即起舉首，號天而哭：「我弟幼稚，才能過人，特為父母之所愛念。奄忽捨身，以飼餓虎。我今還宮，父母設問，當云何答？我寧在此併命一處，不忍見是骸骨髮爪，何心捨離，還見父母妻子眷屬朋友知識？」

時，二王子悲號懊惱，漸捨而去。

H02 明侍從悲苦

時，小王子所將侍從，各散諸方，互相謂言：「今者，我天為何所在？」

H03 明父母悲苦

爾時，王妃於睡眠中，夢乳被割，牙齒墮落，得三鴿雛，一為鷹食。

爾時，王妃，大地動時，即便驚寤，心生愁怖，而說偈言：

今日何故 大地大水 一切皆動 物不安所

日無精光 如有覆蔽

我心憂苦 目睫瞬動 如我今者 所見瑞相

必有災異 不祥苦惱

於是，王妃說是偈已，

時，有青衣在外，已聞王子消息，心驚惶怖，尋即入內，啟白王妃，作如是言：「向者在外，聞諸侍從推覓王子，不知所在。」

王妃聞已，生大憂惱，涕泣滿目，至大王所：「我於向者傳聞外人，失我最小所愛之子。」

大王聞已，而復悶絕，悲哽苦惱，拭淚而言：「如何今日，失我心中所愛重者？」

D02 偈頌

於中有三：①總明捨身大意，②正頌長行，③明結會古今。

E01 總明捨身大意

爾時，世尊欲重宣此義，而說偈言：

我於往昔 無量劫中 捨所重身 以求菩提

若為國王 及作王子 常捨難捨 以求菩提

E02 正頌長行

我念宿命 有大國王 其王名曰 摩訶羅陀

是王有子	能大布施	其子名曰	摩訶薩埵
復有二兄	長者名曰	大波那羅	次名大天
三人同遊	至一空山	見新產虎	飢窮無食
時勝大士	生大悲心	我今當捨	所重之身
此虎或為	飢餓所逼	儻能還食	自所生子
即上高山	自投虎前	為令虎子	得全性命
是時大地	及諸大山	皆悉震動	驚諸蟲獸
虎狼獅子	四散馳走	世間皆闇	無有光明
是時二兄	故在竹林	心懷憂惱	愁苦涕泣
漸漸推求	遂至虎所		

見虎虎子	血污其口	又見骸骨	髮毛爪齒
處處迸血	狼藉在地		
時二王子	見是事已	心更悶絕	自蹙於地
以灰塵土	自塗全身	忘失正念	生狂癡心
所將侍從	覩見是事	亦生悲慟	失聲號哭
互以冷水	共相噴灑	然後蘇息	而復得起
是時王子	當捨身時	正值後宮	妃后嫔女
眷屬五百	共相娛樂		
王妃是時	兩乳汁出	一切肢節	痛如針刺
心生愁惱	似喪愛子		

於是王妃	疾至王所	其聲微細	悲泣而言
大王今當	諦聽諦聽	憂愁盛火	今來燒我
我今二乳	俱時汁出	身體苦切	如被針刺
我見如是	不祥瑞相	恐更不復	見所愛子
今以身命	奉上大王	願速遣人	求覓我子
夢三鵠雛	在我懷抱	其最小者	可適我心
有鷹飛來	奪我而去	夢是事已	即生憂惱
我今愁怖	恐命不濟	願速遣人	推求我子
是時王妃	說是語已	即時悶絕	而復蹙地
王聞是語	復生憂惱	以不得見	所愛子故

其王大臣	及諸眷屬	悉皆聚集	在王左右
哀哭悲號	聲動天地	爾時城內	所有人民
聞是聲已	驚愕而出	各相謂言	今是王子
為活來耶	為已死亡		
如是大士	常出軟語	為眾所愛	今難可見
已有諸人	入林推求	不久自當	得定消息
諸人爾時	悼惶如是	而復悲號	哀動神祇
爾時大王	即從座起	以水灑妃	良久乃蘇
還得正念	微聲問王	我子今者	為死活耶
爾時王妃	念其子故	倍復懊惱	心無暫捨

可惜我子	形色端正	如何一旦	捨我終亡
云何我身	不先薨沒	而見如是	諸苦惱事
善子妙色	猶淨蓮花	誰壞汝身	使令分離
將非是我	昔日怨讎	挾本業緣	而殺汝耶
我子面目	淨如滿月	不圖一旦	遇斯禍對
寧使我身	破碎如塵	不令我子	喪失身命
我所見夢	已為得報	直我無情	能堪是苦
如我所夢	牙齒墮落	二乳一時	汁自流出
必定是我	失所愛子	夢三鵠雛	鷹奪一去
三子之中	必定失一		

爾時大王	即告其妃	我今當遣	大臣使者
周遍東西	推求覓子	汝今且可	莫大憂愁
大王如是	慰喻妃已	即便嚴駕	出其宮殿
心生愁惱	憂苦所切	雖在大眾	顏貌憔悴
即出其城	覓所愛子		
爾時亦有	無量諸人	哀號動地	尋從王後
是時大王	既出城已	四向顧望	求覓其子
煩惋心亂	靡知所在	最後遙見	有一信來
頭蒙塵土	血污其衣	灰糞塗身	悲號而至
爾時大王	摩訶羅陀	見是使已	倍生懊惱

舉首號叫	仰天而哭		
先所遣臣	尋復來至	既至王所	作如是言
願王莫愁	諸子猶在	不久當至	令王得見
須臾之頃	復有臣來	見王愁苦	顏貌憔悴
身所著衣	垢膩塵污	大王當知	一子已終
二子雖存	哀悴無賴		
第三王子	見虎新產	飢窮七日	恐還食子
見是虎已	深生悲心	發大誓願	當度眾生
於未來世	證成菩提	即上高處	投身虎前
虎飢所逼	便起啖食	一切血肉	已為都盡

唯有骸骨	狼藉在地		
是時大王	聞臣語已	轉復悶絕	失念蹙地
憂愁盛火	熾然其身	諸臣眷屬	亦復如是
以水灑王	良久乃蘇	復起舉首	號天而哭
復有臣來	而白王言	向於林中	見二王子
愁憂苦毒	悲號涕泣	迷悶失志	自投於地
臣即求水	灑其身上	良久之頃	乃還蘇息
望見四方	大火熾然	扶持暫起	尋復蹙地
舉首悲哀	號天而哭	乍復讚歎	其弟功德
是時大王	以離愛子	其心迷悶	氣力憊然

憂惱涕泣	並復思惟	是最小者	我所愛重
無常大鬼	奄便吞食	其餘二子	今雖存在
而為憂火	之所焚燒	或能為是	喪失命根
我宜速往	至彼林中	迎載諸子	急還宮殿
其母在後	憂苦逼切	心肝分裂	或能失命
若見二子	慰喻其心	可使終保	餘年壽命
爾時大王	駕乘名象	與諸侍從	欲至彼林
即於中路	見其二子	號天扣地	稱弟名字
時王即前	抱持二子	悲號涕泣	隨路還宮
速令二子	覲見其母		

E03 明結會古今

佛告樹神，汝今當知：

爾時王子 摩訶薩埵 捨身飼虎 今我身是

爾時大王 摩訶羅陀 於今父王 輸頭檀是

爾時王妃 今摩耶是 第一王子 今彌勒是

第二王子 今調達是 爾時虎者 今瞿夷是

時虎七子 今五比丘 及舍利弗 目犍連是

C02 明寶塔因緣

爾時大王 摩訶羅陀 及其妃后 悲號涕泣

悉皆脫身 御服瓔珞 與諸大眾 往竹林中

收其舍利 即於此處 起七寶塔

是時王子 摩訶薩埵 臨捨命時 作是誓願

願我舍利 於未來世 過算數劫

常為眾生 而作佛事

B03 結酬上問

說是經時，無量阿僧祇諸天及人，發阿耨多羅三藐三菩提心。

樹神！是名「禮塔往昔因緣」。

爾時，佛神力故，是七寶塔，即沒不現。

⑱ 讚佛品

準七卷經有二品：初一品，讚能說人德，即是讚歎流通。後一品，明弘所說

教法，即是付屬流通。此四卷經，唯讚歎流通，略無付屬。

就品有二：①明他方菩薩讚他方佛，②明此土大士歎此世佛。

何故彼此各歎者，歎顯能說人德，彼此無異故。

A01 明他方菩薩讚他方佛

就他方讚中：①長行，出能讚之人。②偈頌，出所讚之事。

B01 能讚之人

爾時，無量百千萬億諸菩薩眾，從此世界，至金寶蓋山王如來國土。到彼土已，五體投地，為佛作禮，卻住一面，合掌向佛，異口同音，而讚歎曰：

B02 所讚之事

有二：①讚歎，②迴向。

C01 讚歎

有三：①讚色聲，②歎福慧，③合結。

D01 讚色聲

有三：①歎色相好，②歎音聲，③結。

E01 歎色相好

如來之身 金色微妙 其明照耀 如金山王

身淨柔軟 如金蓮花 無量妙相 以自莊嚴

隨形之好 光飾其體 淨絜無比 如紫金山

圓足無垢 如淨滿月

E02 歎音聲

其音清徹 妙如梵聲 獅子吼聲 大雷震聲

六種清淨 微妙音聲

六種清淨微妙者：①大悲觀世音，②大慈濡雅音，③大梵清淨音，④大光普照音，⑤獅子無畏音，⑥天人丈夫音。

E03 結

有二：①結聲，②結色。

F01 結聲

迦陵頻伽 孔雀之聲 清淨無垢 威德具足

F02 結色

百福相好 莊嚴其身 光明遠照 無有齊限

D02 歎福慧

有二：①歎內德，②歎外化德。

E01 歎內德

智慧寂滅 無諸愛習 世尊成就 無量功德

譬如大海 須彌寶山

半行歎智慧，半行歎功德，半行作譬。

E02 歎外化德

有二：①表拔苦與樂，②廣釋。

F01 表拔苦與樂

為諸眾生 生憐愍心 於未來世 能與快樂

F02 廣釋

有二：①明拔苦與樂之體，②明拔苦與樂之事。

G01 明拔苦與樂之體

如來所說 第一深義 能令眾生 寂滅安隱

能與眾生 無量快樂

G02 明拔苦與樂之事

能演無上 甘露妙法 能開無上 甘露法門

能入一切 無患窟宅

能令眾生 悉得解脫 度於三有 無量苦海

安住正道 無諸憂苦

D03 合結

有三：①明佛德無量，②明無人能知，③明歎不能盡。

E01 明佛德無量

如來世尊 功德智慧 大慈悲力 精進方便

如是無量 不可稱計 我等今者 不能說有

E02 明無人能知

諸天世人 於無量劫 盡思度量 不能得知

如來所有 功德智慧 無量大海 一滴少分

E03 明歎不能盡

我今略讚 如來功德 百千億分 不能宣一

C02 迴向

若我功德 得聚集者 迴與眾生 證無上道

A02 明此土大士歎此世佛

有二：①信相讚，②樹神讚。

B01 信相讚

爾時，信相菩薩即於此會，從座而起，偏袒右肩，右膝著地，合掌向佛，而說讚言：

有二：①別讚，②總歎。

C01 別讚

有三：①歎色身，②歎福慧，③結。

D01 歎色身

有二：①歎色身體，②歎色身用。

E01 歎色身體

世尊百福	相好微妙	功德千數	莊嚴其身
色淨遠照	視之無厭	如日千光	彌滿虛空
光明熾盛	無量無邊	猶如無數	珍寶大聚
其明五色	青紅赤白	琉璃頗梨	如融真金

E02 歎色身用

光明赫奕	通徹諸山	悉能遠照	無量佛土
能滅眾生	無量苦惱	又與眾生	上妙快樂

諸根清淨 微妙第一 眾生見者 無有厭足

髮紺柔軟 猶孔雀項 如諸蜂王 集在蓮花

D02 歎福慧

清淨大悲 功德莊嚴 無量三昧 及以大慈

如是功德 悉以聚集

D03 結

相好妙色 嚴飾其身 種種功德 助成菩提

上半結色身，下半結福慧。

C02 總歎

有二：①歎福慧，②歎色身。

D01 歎福慧

有二：①外化，②內德。

E01 外化

如來悉能 調伏眾生 令心柔軟 受諸快樂

E02 內德

種種深妙 功德莊嚴 亦為十方 諸佛所讚

D02 歎色身

有二：①外化，②內德。

E01 外化

其光遠照 遍於諸方 猶如日月 充滿虛空

功德成就 如須彌山 在在示現 於諸世界

E02 內德

齒白齊密 猶如珂雪 其德如日 處空明顯

眉間毫相 右旋宛轉 光明流出 如琉璃珠

其色微妙 如日處空

B02 樹神讚

有二：①出能讚人，②出所歎事。

C01 能讚人

爾時，道場菩提樹神，復說讚曰：

C02 所歎事

有二：①樹神歎，②如來述。

D01 樹神歎

有三：①合歎應化二身，②別歎法身，③結請。

E01 合歎應化二身

有二：①正歎，②明渴仰。

F01 正歎

有二：①歎三身體，②歎用。

G01 歎三身體

有二：①歎智慧，②歎功德。

H01 歎智慧

有二：①表歎，②釋。

I01 表歎

南無清淨 無上正覺 甚深妙法 隨順覺了

I02 釋

遠離一切 非法非道 獨拔而出 成佛正覺

知有非有 本性清淨

非法者，言邪法也。非道者，言邪道也。

知有者，知世諦也。非有者，知真諦也。本性清淨，知一實諦也。

H02 歎功德

希有希有 如來功德 希有希有 如來大海

希有希有 如須彌山 希有希有 佛無邊行

G02 歎用

有二：①總表出世希有，②明希有事。

H01 總表出世希有

希有希有 佛出於世 如優曇花 時一現耳

H02 明希有事

有二：①歎外化德，②歎內證德。

I01 歎外化德

希有如來 無量大悲 釋迦牟尼 為人中日
為欲利益 諸眾生故 宣說如是 妙寶經典

I02 歎內證德

有二：①明能證智，②明所證理。

J01 明能證智

善哉如來 諸根寂滅 而復遊入 善寂大城

無垢清淨 甚深三昧 入於諸佛 所行之處

諸根寂滅者，言於諸根中煩惱不起，是數滅無為。

善寂大城者，言大涅槃，即是德滅無為也。

甚深三昧者，謂禪定也。入諸佛所行處者，謂智慧也。

此禪定智慧即是菩提德也。

J02 明所證理

有三：①明聖道空，②明萬法空，③明眾生空。

K01 明聖道空

一切聲聞 身皆空寂 兩足世尊 行處亦空

身皆空寂者，言二乘道空。

行處亦空者，言大乘之道，是如來行處，此道空亦空也。

K02 明萬法空

如是一切 無量諸法 推本性相 亦皆空寂

性相亦空者，言真實依他離性者故空。分別無相故，相亦空也。

K03 明眾生空

一切眾生 性相亦空 狂愚心故 不能覺知

F02 明渴仰

有二：①明彼渴仰願見，②願佛慈悲攝受。

G01 明彼渴仰願見

有四：①舉念佛善以願見，②舉禮拜善以願見，③舉修悲行以願見，④舉渴仰憂火以願見。

H01 舉念佛善以願見

我常念佛 樂見世尊 常作誓願 不離佛日

H02 舉禮拜善以願見

我常於地 長跪合掌 其心戀慕 欲見於佛

H03 舉修悲行以願見

我常修行 最上大悲 哀泣雨淚 欲見於佛

H04 舉渴仰憂火以願見

我常渴仰 欲見於佛 為是事故 憂火熾然

G02 願佛慈悲攝受

有三：①願說法水，令滅憂火，②願佛現身，令我常見，③結請。

H01 願說法水 令滅憂火

惟願世尊 賜我慈悲 清冷法水 以滅是火

H02 願佛現身 令我常見

世尊慈愍 悲心無量 願賜我身 常得見佛

H03 結請

世尊常護 一切人天 是故我今 渴仰欲見

E02 別歎法身

有二：①歎法身深智，②明物不能知。

F01 歎法身深智

有二：①明生死虛妄，②明法身真實。

G01 明生死虛妄

聲聞之身 猶如虛空 焰幻響化 如水中月

眾生之性 如夢所見

G02 明法身真實

如來行處 淨如琉璃 入於無上 甘露法處

能與眾生 無量快樂

淨如瑠璃者，言法身之體，離於萬相，故名為淨。即是三無性理也。

F02 明物不能知

如來行處 微妙甚深 一切眾生 無能知者

五通神仙 及諸聲聞 一切緣覺 亦不能知

E03 結請

有二：①結法應二身，②請現化身。

F01 結法應二身

我今不疑 佛所行處

佛者，謂應身也。所行處者，是法身也。

F02 請現化身

惟願慈悲 為我現身

D02 如來述

爾時，世尊從三昧起，以微妙音，而讚歎言：

善哉善哉 樹神善女 汝於今日 快說是言

一切眾生 若聞此法 皆入甘露 無生法門

①9 囑累品

爾時，釋迦牟尼佛從三昧起，現大神力，以右手摩諸菩薩摩訶薩頂，與諸天王及諸龍王、二十八部、散脂、鬼神、大將軍等，而作是言：我於無量百千萬億恆河沙劫，修習是《金光明》微妙經典。汝等當受持、讀誦、廣宣此法。復

於閻浮提內，無令斷絕。

若有善男子善女人，於未來世中，有受持、讀誦此經典者。汝等諸天常當擁護。當知是人，於未來世無量百千人天之中，常受快樂。於未來世值遇諸佛，疾得證成阿耨多羅三藐三菩提。

爾時，諸大菩薩，及天龍王二十八部、散脂大將等，即從座起，到於佛前，五體投地，俱發聲言：如世尊勅，當具奉行。

如是三白：如世尊勅，當具奉行。

於是，散脂大將等，而白佛言：如世尊勅，若未來世中，有受持是經，若自書、若使人書。我當與此二十八部諸鬼神等常當隨侍擁護，隱蔽其身。是說法者，皆悉消滅諸惡，令得安隱。願不有慮。

爾時，釋迦牟尼佛現大神力，十方無量世界，悉皆六種震動。

是時，諸佛皆大歡喜。

囑累是經故，讚美持法者，現無量神力。

於是，無量無邊阿僧祇菩薩摩訶薩大眾及信相菩薩，金光、金藏、常悲、法上等，及四天大王、十千天子，與道場菩提樹神、堅牢地神，及一切世間天、人、阿脩羅等，聞佛所說，皆發無上菩提之道，踊躍歡喜，作禮而去。

金光明經疏

無上妙法喜見聞 金光明諸經之王 四佛世尊所護持 懺除結業無垢穢

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地青山公路18號  mfbm.hk